



聖詠經



上帝降生一千八百七十九年

歲次己卯

京都東教宗北館



China Orthodox Press

香港

2016

之義德如光標爾之真實如午日爾當歸服主而恃之毋妬奸
惡之人其謀有順適者須息爾之怒遺爾之憾毋妬伊等致自
為惡蓋為惡者必見絕惟恃王者將得土不久惡者當亡爾觀
其所即無矣其謙遜者則將嗣土而極享太平惡人謀攻義人
而切齒主哂之因見其日將屈矣諸惡人掣劍張弓欲摧仆苦
及貧者而刺貫行正道者其劍反自刺其心其弓必為斷折義
者雖少乃勝惡者之富蓋惡者之筋必為斷折其義者主扶持
之主知諸無罪者之日而其嗣業將永存其於患難之時弗至

目录

聖詠經序	7	第十九聖詠	25
凡例	8	第二十聖詠	25
第一分	9	第二十一聖詠.....	26
第一聖詠	9	第二十二聖詠.....	28
第二聖詠.....	9	第二十三聖詠.....	28
第三聖詠.....	10	第四分	29
第四聖詠.....	11	第二十四聖詠.....	29
第五聖詠.....	11	第二十五聖詠.....	30
第六聖詠.....	12	第二十六聖詠.....	31
第七聖詠.....	13	第二十七聖詠.....	32
第八聖詠.....	14	第二十八聖詠.....	33
第二分	14	第二十九聖詠.....	33
第九聖詠.....	14	第三十聖詠	34
第十聖詠.....	17	第三十一聖詠.....	36
第十一聖詠	17	第五分	37
第十二聖詠	18	第三十二聖詠.....	37
第十三聖詠	18	第三十三聖詠.....	38
第十四聖詠	19	第三十四聖詠.....	39
第十五聖詠	19	第三十五聖詠.....	41
第十六聖詠	20	第三十六聖詠.....	41
第三分	21	第六分	44
第十七聖詠	21	第三十七聖詠.....	44
第十八聖詠	24	第三十八聖詠.....	45

第三十九聖詠.....	46	第六十二聖詠.....	67
第四十聖詠.....	47	第六十三聖詠.....	68
第四十一聖詠.....	48	第九分.....	69
第四十二聖詠.....	49	第六十四聖詠.....	69
第四十三聖詠.....	50	第六十五聖詠.....	70
第四十四聖詠.....	51	第六十六聖詠.....	71
第四十五聖詠.....	52	第六十七聖詠.....	71
第七分.....	53	第六十八聖詠.....	74
第四十六聖詠.....	53	第六十九聖詠.....	76
第四十七聖詠.....	54	第十分.....	76
第四十八聖詠.....	54	第七十聖詠.....	76
第四十九聖詠.....	56	第七十一聖詠.....	78
第五十聖詠.....	57	第七十二聖詠.....	79
第五十一聖詠.....	58	第七十三聖詠.....	80
第五十二聖詠.....	59	第七十四聖詠.....	82
第五十三聖詠.....	59	第七十五聖詠.....	82
第五十四聖詠.....	60	第七十六聖詠.....	83
第八分.....	61	第十一分.....	84
第五十五聖詠.....	61	第七十七聖詠.....	84
第五十六聖詠.....	62	第七十八聖詠.....	88
第五十七聖詠.....	63	第七十九聖詠.....	89
第五十八聖詠.....	64	第八十聖詠.....	90
第五十九聖詠.....	65	第八十一聖詠.....	91
第六十聖詠.....	66	第八十二聖詠.....	91
第六十一聖詠.....	66	第八十三聖詠.....	92

第八十四聖詠.....	93	第一百五聖詠.....	115
第十二分.....	94	第一百六聖詠.....	117
第八十五聖詠.....	94	第一百七聖詠.....	119
第八十六聖詠.....	95	第一百八聖詠.....	120
第八十七聖詠.....	95	第十六分.....	122
第八十八聖詠.....	96	第一百九聖詠.....	122
第八十九聖詠.....	99	第一百十聖詠.....	122
第九十聖詠.....	100	第一百十一聖詠.....	123
第十三分.....	101	第一百十二聖詠.....	123
第九十一聖詠.....	101	第一百十三聖詠.....	124
第九十二聖詠.....	102	第一百十四聖詠.....	125
第九十三聖詠.....	102	第一百十五聖詠.....	126
第九十四聖詠.....	104	第一百十六聖詠.....	126
第九十五聖詠.....	104	第一百十七聖詠.....	126
第九十六聖詠.....	105	第十七分.....	128
第九十七聖詠.....	106	第一百十八聖詠.....	128
第九十八聖詠.....	107	第十八分.....	136
第九十九聖詠.....	107	第一百十九聖詠.....	136
第一百聖詠.....	108	第一百二十聖詠.....	137
第十四分.....	108	第一百二十一聖詠.....	137
第一百一聖詠.....	108	第一百二十二聖詠.....	138
第一百二聖詠.....	110	第一百二十三聖詠.....	138
第一百三聖詠.....	111	第一百二十四聖詠.....	139
第一百四聖詠.....	113	第一百二十五聖詠.....	139
第十五分.....	115	第一百二十六聖詠.....	139

第一百二十七聖詠.....	140	第一百四十聖詠.....	149
第一百二十八聖詠.....	140	第一百四十一聖詠.....	150
第一百二十九聖詠.....	141	第一百四十二聖詠.....	150
第一百三十聖詠.....	141	第二十分.....	151
第一百三十一聖詠.....	141	第一百四十三聖詠.....	151
第一百三十二聖詠.....	142	第一百四十四聖詠.....	152
第一百三十三聖詠.....	143	第一百四十五聖詠.....	153
第十九分.....	143	第一百四十六聖詠.....	154
第一百三十四聖詠.....	143	第一百四十七聖詠.....	154
第一百三十五聖詠.....	144	第一百四十八聖詠.....	155
第一百三十六聖詠.....	145	第一百五十聖詠.....	156
第一百三十七聖詠.....	146	聖詠經終.....	157
第一百三十八聖詠.....	147	續聖詠.....	157
第一百三十九聖詠.....	148		

聖詠經序

古遺詔中聖詠。多係聖王大衛。及古聖先知所撰。乃預為救世者所述之預言、並訓導人行善。文者駢儷。便於頌歌。故名之為詠。實乃祈禱讚揚上帝之規模也。是以古今聖堂中。時常誦之。而誠信熱衷之人。家居亦應晨昏諷詠。以表其愛敬上帝之誠。或藉此克以誓除罪蒂。望目前賜救贖之恩。力積善功。期身後享福樂之報。裨益誠非淺鮮。第中華譯本不一。語意間有參差。讀者無所適從。茲特遵聖經本義譯出。於經語不敢率意倒置。庶誦禱課者。有所遵守。刊竣。呈政同道者。幸匡其謬誤焉。

凡例

聖詠外。別有續聖詠一章。亦係大衛王所撰。向不列于百五十章之內。此書係為禱課所用。特附載於後。以昭全備。

百五十章內第一第二係紀原敘者。因其無關祈禱概置弗錄。直從第二第三節。起以歸簡捷。

此書原為禱課所用。故將百五十章。共析為二十分。每分析為三段。每段後。附以榮光讚詞。以清節目。

凡在家祈禱者。每誦至榮光讚詞時心中應記憶存亡諸人。代為祈禱。以盡愛人如己之義。

榮光讚詞。乃教眾平素所熟誦者。今只將詞句次序。總錄於前。以下每段末惟標榮光讚詞四字以括之。為省文也。

榮光讚詞次序：

榮光於父及子及聖神，自今至恒久及無窮世，阿民。

阿利魯伊阿，阿利魯伊阿，阿利魯伊阿，主讚揚爾（誦三次）主矜憐我等（誦三次），又誦「榮光至阿民」。

聖詠經

第一分 第一聖詠

一福哉、弗趨至惡人之議論者、不立於罪人之道
路者、不偕壞人以相坐者、二其志在主之法而晝
夜注思之、三伊將如植於溪濱之木、依時結果、其
葉不萎、凡作者皆遂意、四至彼惡人則否、乃如於
地為風吹散之秕糠、五是惡人於審判及罪人、于義
人中、不能自立、六因主不忘義人之道、而惡人之
途必滅。

第二聖詠

一異邦何為鬩亂、列民何為徒謀、二諸世王興
起、諸公卿聚議、為敵上帝及其基督、三謂我儕

須斷氣縛、棄其桎、^四然在天者乃哂之、主藐視伊等、^五其時必發威責斥之、以赫怒震赫之、^六我立之為我錫安聖山之君、^七我將傳定命、主曾對我曰、爾乃我之子、我今生爾、^八爾可求我、我必以萬民予爾作嗣業、又以地極屬爾統轄、^九爾可以鐵棒毀壞伊等、擊碎伊等猶如瓦器雲、^十是以列王歟當覺悟、地上統理者、^{十一}應學之、當以敬畏事主、以戰慄喜悅之、^{十二}當恭敬子、恐伊發怒、懼爾儕於途間滅亡、因主之怒旋將轟烈、福哉、凡倚望主者。

第三聖詠

^一吾主、我之讎敵極多矣、眾多背畔我、^二眾多為我靈曰、彼不能獲救於上帝、^三然我主歟、爾為我之盾、系我之榮光、爾仰我首、^四我發聲籲主、而主自其聖山聞之、^五我臥而眠而覺、蓋我主護我、^六我弗懼之萬民、環而攻擊我、^七主起歟、我主救我、因主親手批我諸讎敵之頰、折惡人之齒、^八救系自主、爾降福於爾民。

榮光讚詞

第四聖詠

二我之義主、我籲爾之時、祈聞之、我於窘狹
 時爾已寬之、矜憐我聆我之禱、三人之子歟、我之
 榮光被輕藐至何時、爾曹喜虛偽、及求為詭詐至
 何時、四爾曹宜知、主特析其聖人屬伊、我籲主、
 主聽之、五爾曹忿時、毋犯罪、於榻上靜思安慰
 之、六爾薦義祭、而倚恃主、七有多人曰、誰示我
 以善、主歟、爾面之光、祈示我儕、八主已滿我心
 以悅樂、勝彼穀糧酒油之充裕時、九我坦然偃臥、
 因惟主賜我平安度生。

第五聖詠

二主歟聽我之言詞、洞澈我之思慮、三聆我
 呼籲之聲、我君我上帝、因我惟禱爾、四主歟、
 晨聽我之聲、我旦將立於爾前而候、五蓋爾乃上
 帝、不悅無道、惡人不能偕爾處、六諸惡者弗得
 立於爾目前、爾憎一切無道者、七爾必壞妄言
 者、殘忍詭詐者主疾之、八至我倚爾之鴻恩、將
 進爾之室、以敬畏爾伏拜於爾聖堂前、九主歟、

以我之讐敵爾導我於爾公義、于我前修平爾道、
+蓋於伊等口無真實、其心陷害、伊等喉如開啟
之墓、其舌滑稽、+一主歟、定伊等之罪、使伊等
為其謀而敗、因伊等惡積而棄之、蓋伊等叛爾、
+二而倚爾者將喜、及永樂之、而爾護佑之、愛爾
名者、將以爾而自詡、+三因主賜福予義人、以恩
如盾環衛之。

第六聖詠

二主歟、毋以忿憤責斥我、毋以赫怒罰我、
三主歟、矜憐我、四我懦弱、主歟、醫我、因我骸
悚動、五我靈極戰兢、主將至何時、六主歟、回轉
拯濟我靈、緣爾之恩而救我、七蓋於死中莫能憶
爾、墓中孰讚頌爾、八我因嗟歎而困倦、每夜
以涕滌我榻、以淚浸濕我席、九我眸因憂鬱而枯、
因我眾讐敵而衰、十爾等一切行無道者、離我、蓋
主已聞我號泣之聲、十一聆我之祈、主將納我之禱、
十二禱願我之眾仇敵、愧恥被擊傷、顧伊等倏然間
退而羞慚。

榮光讚詞

第七聖詠

二主歟、我上帝歟、我倚恃爾、救我於一切窘迫我者、而援拔之、
三願彼毋拔我之靈、如獅之擘分而無救濟者、
四主歟、我上帝歟、我若曾為何事、我若手內誠有不宜之事、
五我若以惡報素與我和睦者、且人無故與我構仇、我亦不時救之、
六若有此失、則願仇敵追及、執我之靈、踏我生命於地、
擲我榮華於塵、
七主歟發怒而起、向我仇敵之狼厲、為我起行爾前所許之審判、
八大眾將環向之、爾其升舉之、
九主審判萬民、求主依我之公義、及我之純誠、而判議之、
十願惡者之忿恨止息、求爾堅固義人、蓋爾公義之上帝、能鑒察人之心腑、
十一我之盾在救正心者之上帝、
十二上帝乃公義審判者、強健者、恒久寬容者、
十三若有人弗歸、則每日嚴訊者、主礪其刃、張其弓、而對指之、
十四設死之具、其矢為發箴者、
十五此惡人懷違理、孕狠毒、而生詭詐、
十六掘阱已竣、反自陷於其阱、
十七其狠毒歸於其首、其悖逆歸於其頂、
十八以主公義、我讚揚之、而歌頌至上之名。

第八聖詠

三主歟、我等之上帝、爾之名何其大、被于全地、主榮超於諸天上、^三而借孺子乳食之口作讚揚、爾為爾仇敵、使仇敵及報復者緘默、^四我仰觀爾之諸天、係爾手所作者、月星系爾所置者、^五其人為何物爾憶之、其人子為何物而爾眷顧之、^六爾降彼較遜於天神、以尊榮冠冕之、^七立之而統制爾手所造之物、置諸物於其足下、^八凡牛羊及野獸、^九飛空之禽、海鱗一切游於海者、^十主歟、我等之上帝、主之名何其大、被于全地。

榮光讚詞

第二分 第九聖詠

三主歟、我將盡心稱揚爾、而傳揚爾之諸奇事、^三至高者我將為爾慶忭、歌頌於爾之名、^四我之仇敵既被退、及顛躓、而亡於爾面前、^五因爾為我伸冤及訟理、公義審判者、坐於寶座、^六爾發怒

第二分

於異邦、殲誅惡人、令其名磨滅至無窮世、^七諸仇敵失盡兵刃、且爾毀諸城、及伊等之名亦並滅、^八而主乃永在、設備寶座、為行審判、^九依公義將審判普世、據真理判治萬民、^十主將予受屈者為趨避處、予遇危難時為安棲處、^{十一}凡承認爾名者、將冀望爾、因主不棄求爾者、^{十二}應歌頌駐錫安之主、而傳其所行之事於萬民中、^{十三}因主問流血之罪、憶而不忘其受欺凌叱咤者、^{十四}主歟、提升我於死之門者、矜憐我、顧我於仇敵所受之苦難、^{十五}為我能以稱揚諸美爾之詞、於錫安之城門內、而將悅爾之救拔、^{十六}異邦已陷於其所掘之阱內、繫其足於伊等所潛伏之網內、^{十七}主以行審判而被識、惡人以其手中所為之事、而被牢籠、^{十八}願惡人及諸忘主之異邦、赴地獄、^{十九}蓋貧寡者、不能常被忘、窮困者之冀望、終不能失落、^{二十}求主歟起、莫令人獲勝、願異邦於爾面前受審判、^{二十一}主歟、使伊等畏懼、令萬民自知伊等係人、^{二十二}主歟、何為遠立、自隱於危難之時、^{二十三}惡人以驕傲而凌迫貧窮者、願伊等陷於其計謀、^{二十四}因惡人以其心之貪慾自矜詡、貪財者自

稱揚、^{二五}惡人以驕傲而藐視主、曰、必不問、凡其諸思念、以為無上帝、^{二六}其每行之道、嘗係有害爾之律法、去伊甚遠、而藐視其諸仇敵、^{二七}其心謂我必弗搖動、我世世弗遭兇惡云、^{二八}其口充滿以詛咒詭計欺詐、其舌下乃窘迫殘害、^{二九}其潛伏於圍垣後、於暗處害無辜者、以目諦視貧者、^{三十}於暗處伺候、如獅之在其窟中、埋伏待捉貧者、即捉貧者牽之於己之網內、^{三一}曲伏而貧者落於其爪、^{三二}其心謂上帝忘而蔽面、永弗見、^{三三}主歟、我上帝歟、起舉爾手、莫忘爾之受窘迫者、^{三四}惡人何以藐視上帝、其心謂爾弗責之、^{三五}而爾乃見之、爾見窘迫及凌虐、為報應之以爾之手、貧者付於爾、為孤獨者爾係護佑、^{三六}求主擊折罪惡人之筋力、致其惡事無從尋、^{三七}主係君於無窮世、異邦將潰滅於其地、^{三八}主歟、爾聽謙卑者之所願、求固其心、開爾之耳、^{三九}為讞（yàn/一ㄢˋ/音現，jin⁶）彼孤獨窘迫者、不令人駭畏之於地上。

第十聖詠

一我向主而冀望、而爾曹何為向我靈曰、爾可飛至山巔、若鳥然、^二蓋惡人張弓注矢弦、意欲暗中射彼心義者、^三伊等根基既壞、義者何能為、^四主居於其聖堂內、主之寶座在天、主目顧貧者、主眼鑒察人子等、^五主試驗義者、而心厭惡人、及強暴者、^六將以熱炭烈火硫磺、傾注於惡人如雨、炎風為伊等之分、即飲爵之分、^七因主係公義者、喜公義、其面顧正直者。

榮光讚詞

第十一聖詠

^一主歟、救我、因缺義德之人、於人子中無虔信者、^二人向人互言虛妄、諂媚之口、所言由詭詐之心、^三主將滅諂口、及誇舌、^四彼謂我舌能勝脣、係我儕者、誰能為我主、^五主曰、因貧者受苦、窮者嗟嘆、我今欲起、將救彼為人所欲執者、^六主言乃清潔者、如銀於爐冶砂中所鎔淨、而煅經七次者、^七主歟、爾將保佑之、自今至世

世護持之、^九人子中么魔者、既升高位、惡人遂環行。

第十二聖詠

^一主歟、忘我將至幾何時、掩爾面於我躬、將至幾何時、^二我之靈魂內謀計、心中夙夜忉怛、將至幾何時、我仇敵勝我、將至幾何時、^三主歟、我之上帝、視我聽我、光明我目、不使我沉眠至終、^四為不使我仇敵曰、我勝之矣、為不使我撼搖時凌虐我者喜樂、^五我倚爾之仁慈、我心喜悅於爾之救拔、我將讚頌施恩於我之主、及稱頌至上主之名。

第十三聖詠

^一愚惘者心謂無上帝、伊等心壞矣、已行惡之事、無一作善者、^二主自天俯觀人子、為察其間有認識及覓求上帝者否、^三乃皆偏歧、均朽敗、無行善者、即一亦無、^四凡作惡者、吞我民如餌者、弗祈求上帝者、豈皆不明悟、^五無可懼之處、伊等皆懷驚、因上帝係在義人之儔、^六爾曹視貧者之謀、乃主為其冀望、爾輕藐之曰、^七孰自錫安而

賜救於以色列人、主救回被掠之民時、而雅各將歡欣、以色列人亦將快樂。

榮光讚詞

第十四聖詠

一主歟、孰堪居爾居處、孰堪在爾聖山、
二惟行無辜者、為公義者、及存真心發言者、
三舌不道讒佞之言、不害親人、亦弗受謗於親者、
四目藐視邪僻者、而頌揚敬畏上帝、曾向人設誓、
雖於惡人亦弗更變、五不以己銀作利債、不受賂以陷無辜者、
如此行者、永弗撼搖。

第十五聖詠

一上帝歟、護佑我、因我倚恃爾、二我曾向主曰、
爾係我主、我之善行於爾無益、三我所願乃爾地上之聖人、
及爾之奇大者、四其趨向外神者、儘使其憂益多、
而我則不奠之以其血祭、並我口不題伊等之名、
五主乃我之嗣業、我卮之分、爾持我之分、
六我之壟界、周於美壤、我所嗣產、予我可喜、
七我將讚頌啟牖我之主、以至宵間、我心腹亦

警訓我、^八我嘗見主於我前、因伊處於我右、我即弗動、^九因此我心喜悅、我舌快樂、以至我體安然於望、^十因爾將不令我靈留於暗府、並不令爾之聖者見朽壞、^{十一}爾將示我以生路、於爾面前、乃歡欣充滿、於爾之右手、乃快樂與世世。

第十六聖詠

^一主歟、聽明我之正直、聆我之呼籲、納我由無偽之口唇所出之禱、^二求爾審我之判、出於爾面前、而爾目視正直、^三爾已試我心、爾宵臨至我、鍊驗我、殊無可摘者、我口不離於我心、^四依爾口所言、我於人事中、護我行於逼迫者之途、^五求堅我步於爾之路、為我足弗搖撼、^六上帝歟、我籲爾、蓋爾將聽之、側爾之耳、聆我之言、^七施爾之奇恩、爾救諸望爾之人、於抗拒爾右手者、^八爾護我如眸子、以爾之翼覆蔽我、^九於攻我之惡人前、及於我靈之仇敵環我者、^十彼以脂膏自錮、口談驕傲、^{十一}今步步環我儕、注目欲僕我於地、^{十二}其環我如貪噬之獅、如小獅坐於隱暗處、^{十三}主歟、起、先伊至、顛僕之、以爾之刀救我靈

於惡者、^{十四}以爾手救我於人、即於世人、其福在今生者、以爾之財寶充滿其腹者、伊等之子皆饜足、以至遺其餘於彼後裔、^{十五}我乃以義將見爾面、覺起之時、以見爾容而自滿足。

榮光讚詞

第三分 第十七聖詠

^二主歟、我之能力、我將慕爾、^三係我之保障、我投避之所、救護我者、我之上帝、我之磐石、我倚恃之、我之盾、救我之角、為我之歸所、^四我將籲當尊之主、而離我於仇敵、^五致死之痛苦纏繫我、魔之溪流震嚇我、^六地獄之鎖環我、死之網罟縛我、^七我於窘難中曾籲主、呼我上帝、而伊由聖殿中聆我之聲、我之號呼、達于伊耳、^八因主之赫怒、地已震動、山基搖移、^九因伊之怒發煙燄、自其口噴烈火、炭火轟流、^十伊側天而下、其足下黑暗、^{十一}騎于赫儒文、而飛翔風之翼上、^{十二}以黑暗為幕罩、以雲水之黑暗為圍幄、

^{十三}伊之面前光輝、雲雹火炭飛過、^{十四}主天上轟雷、至上者、發己之聲雹及紅炭、^{十五}射己矢而潰之、施眾電火而散之、^{十六}主歟因爾威嚴之聲、因爾怒氣出水泉、顯露天下之基、^{十七}伊自上舒其臂、執我而提出之于水中、^{十八}救我於我強悍之仇敵、及於眾疾我較強於我者、^{十九}彼攻我於我遇難之時、而有主為我之依、^{二十}伊引出我至寬綽之地、而救之、因其眷顧我、^{二十一}主按我之公義而償我、按我手之純潔、而善報之、^{二十二}因我素守主之道、於我上帝前、未曾為惡者、^{二十三}因其諸誠常於我前、其律我未嘗背離、^{二十四}我于伊前、夙係無罪者、而謹防犯罪、^{二十五}故主償我、按我之公義、及我手之純潔、於其面前、^{二十六}爾于慈善者、待以慈善、於真誠者、待以真誠、^{二十七}於清潔者、待以清潔、於奸邪者、待之按其奸邪、^{二十八}因爾救窘迫者、而抑驕目、^{二十九}主歟爾然我燈、我之上帝、光啟我之昏暗、^{三十}偕爾我敗敵軍、偕我上帝、升城堞、^{三十一}上帝者其道係純、其言係潔、係凡倚伊者之盾、^{三十二}因主之外、孰為上帝、我上帝之外、孰為護佑、^{三十三}上帝以力束我、備我坦道、^{三十四}使

我足如鹿足、置我于高區、^{三五}教我手爛於戰、而我臂壞銅弓、^{三六}爾賜我爾拯救之盾、爾之右手扶持我、爾恩尊大我、^{三七}爾寬我步於下、而我足弗搖動、^{三八}我逐我之讐仇及之、以至弗旋弗殺盡、^{三九}擊傷之、而伊等弗能起、顛僕於我足下、^{四十}因爾曾以力束我、為能戰、且降服攻擊我者、於我足下、^{四一}爾轉我仇敵之背於我前、而我殲怨我者、^{四二}伊等雖呼而無救者、籲於主、而伊弗應、^{四三}我散伊等、如風於灰塵、踏如衢（qú/ㄑㄨˊ、音渠，keoi⁴）泥、^{四四}爾曾救我於民之擾亂、立我為異邦之首領、我素所未識之民奉事我、^{四五}彼一聞我名、即服我、而異邦人諂事我、^{四六}異邦之人、面變色、而戰兢於其固塞、^{四七}主係永在、護佑我者、應讚頌救我之上帝、應稱揚、^{四八}上帝係代我報復者、使諸邦歸服我者、^{四九}而救我於我仇敵者、爾令我勝夫攻擊我者、脫離我於強悍之人、^{五十}因此我將稱揚爾於異邦之中、而歌頌爾之名、^{五一}爾係大救君、及施宏恩於爾所傳之大衛、並其後嗣於后世者。

榮光讚詞

第十八聖詠

三諸天宣上帝之榮名、穹蒼明誥其手所造者、
三此日傳言於彼日、此宵傳知於彼宵、四無言無語
不聽其音者、五其聲行逾普地、其言直至地涯、伊
在彼建日之居處、六而日出如新郎出新室、喜如
勇士欣驅馳、七彼出於天涯、行入於天涯、而無物
不蒙其燠、八主之法律、係成者、能健靈、主之啟
示、係誠實者、能使蒙者慧、九主之命、係正直
者、能悅人心、主之誠諭、係明潔者、能明目、
十畏主之震、係純潔者、存於永遠、主之諸判、係
真實而公義者、十一較黃金以至多精金為可慕、甘
勝蜜及蜂房所垂注者、十二爾之僕、藉此得護衛、
守之得大賚、十三孰能見己之諸過誤、求爾潔我於
潛隱、十四毋容爾僕故犯、為不使其主制於我、則
我正直焉、而淨大慝（tè/去ㄛˋ /音剔，tik¹）、
十五主歟、我之保障、我之救援、願爾悅我口所
言、及心所思者。

第十九聖詠

二願主聆爾於憂患之日、願雅各之上帝名、護佑爾、三願伊自聖所中施助於爾、由錫安建立爾、四憶爾所祭獻者、及爾全燔為豐腴、五願主賜爾順爾之心、而成全爾所謀者、六我儕將喜爾之得救、而將舉旌於我上帝之名、願主滿遂爾所求者、七今我知主救被傳油者、而以其救拯右手之力、允之自伊諸聖天、八有以車以馬為自矜者、而我儕乃以我主上帝之名自詡、九伊等搖動而顛僕、而我儕則起而卓立、十主歟、救君、而於我儕籲爾之時聆納之。

第二十聖詠

二主歟、令國君藉爾之力喜悅、以爾之救歡樂無盡、三爾曾賜之其心所願者、而弗辭其口所求者、四因爾曾以寵福迎之、以精金冠冠於其首、五其求生命於爾、即賜壽無疆、六於爾之施救、其榮光乃大、爾以威嚴與榮華覆之、七爾曾賜之寵福於世世、以爾歡容使之喜悅、八因國君倚賴主、藉至上主之恩、不至搖動、九爾手將執盡爾仇敵、

爾右手將覓捉憾爾者、⁺爾怒時將造之如火爐、主於怒時將滅之、而火將齧（niè/ㄋㄧˋㄟˋ、/音熬, jit⁶）之、⁺爾將滅其後裔於地上、並絕其苗類于人中、⁺因其曾謀害於爾、彼曾設機、乃弗能成、⁺爾將使之為鴿、而以爾諸弓、射矢於其面、⁺主歟、願爾以爾之力自揚舉、而我儕將稱頌讚揚爾之權能。

榮光讚詞

第二十一聖詠

^二我之上帝歟、我之上帝歟、祈聽我、何為遺棄我、我號泣之言、遠離於我之救、^三我之上帝歟、我晝呼籲、而弗應、夜間呼籲、而我弗得安、^四然爾聖者、爾居於以色列人、讚頌之中、^五我之諸祖、曾倚恃於爾、而以倚恃爾曾救伊等、^六伊等曾呼籲於爾、而獲救、曾冀望於爾、而弗承羞、^七我乃係蟲、非係人、人所謗者、民所藐者、^八凡見我者、皆欺笑我、頷之而口內曰、^九伊曾倚恃主、主即可救之、苟彼獲愛於主、即可以救之、⁺然爾出我於腹中、於我食母乳時、置冀

望於我中、^{十一}我自於腹中、即系附托於爾、自我於母腹中時、爾即為我之上帝、^{十二}毋離我、因憂患邇矣、而無護佑者、^{十三}有多犢牛曾環我、瓦桑之牡牛已圍我、^{十四}張口於我、如極耽且吼之獅、^{十五}我注如水、我諸骸散矣、我心如燭鎔於我腸中、^{十六}我力枯如片瓦、我舌貼於齶上、爾將擲我於死之塵埃、^{十七}因諸犬環我、惡人之隊圍我、刺穿我之手足、^{十八}可數我之諸骨、而伊等注目笑視之、^{十九}互分我之衣、鬪獲我之裳、^{二十}主歟、毋離我、我之力歟佑我、^{二十一}救我靈於刀劍、救我孤魂於犬爪、^{二十二}祈救我於獅口、聆我而救之於兕（si/ㄙㄩˋ /音字，zi⁶）角、^{二十三}我將以爾名傳揚于弟兄中、稱頌於會中、^{二十四}凡敬主者、應讚揚之、雅各之眾後裔、應歌頌之、以色列之眾苗嗣、應敬畏之於其前、^{二十五}因伊不輕視而弗厭斃（qióng/ㄑㄩㄥˊ /音鯨，king⁴）苦者之憂、弗轉避己面於彼、而于伊呼籲之時聆之、^{二十六}我之稱頌於大會中、係為爾、我酬我之願於敬畏之前、^{二十七}願貧者食之即飫、尋主者讚揚之、爾等之心、永生活、^{二十八}地之諸極、將記憶主而歸之、其諸異邦之儔、將拜於

爾前、^{二九}蓋國權屬主、而主統轄萬民、^{三+}于地上
豐盛者、將食而叩拜、凡歸塵土者、不獲護其靈
者、將跪伏于伊前、^{三一}我後裔必奉事伊、將稱之
為主後裔、^{三二}伊等將至、傳主之公義、及主所行
者、于後生之人。

第二十二聖詠

^一主係我之牧者、而我將無欠缺、^二伊善安我於
豐草之壤、引我于清平之水、^三扶持我靈為己名、
導我於義德之途、^四倘我經於死暗之谷中、亦弗懼
遇害、因爾偕我、爾之棒及杖慰我、^五爾為我構筵
向眾仇敵、傳膏於我首、而我爵充滿、^六是以願爾
之恩寵慈愛、隨我一生、而我多日居於主堂內。

第二十三聖詠

^一大地及其所載之諸物、世界及所處之生靈、
皆屬主、^二因伊基地於海上、定之於江河上、^三孰
能陟主之山、孰能立於其聖所、^四惟無罪之手、潔
淨之心、不失己靈於虛偽、不設偽誓於相親者、
^五即能受主之福、能獲上帝救者之恩寵、^六尋主者

即似此類、雅各之上帝歟、尋爾面者即似此類、
七闕應舉高、其閘閔 (hàn hóng/ㄏㄢˋ ㄏㄨㄥˊ /音
翰宏, hon⁶ wang⁴) 永長之門、應崇之、因威榮之
君將入、八此威榮之君為誰、乃勇力之主、戰勝之
主、九闕應舉高、其閘閔永長之門、應崇之、因威
榮之君將入、十此威榮之君為誰、乃諸天軍之主、
伊即謂威榮之君。

榮光讚詞

第四分 第二十四聖詠

一主歟、我向爾升舉我之靈、二我之上帝歟、
我冀望爾、使我於世世無羞愧、毋使我之仇敵、
勝我而喜樂、三凡冀望爾者、使其亦無羞愧、無故
違理者、願其羞愧、四主指示我爾之路、訓我爾之
途、五導我於爾之真理、而訓之、因爾乃救我之上
帝、我每日冀望爾、六主憶念爾之慈惠、及恩賜、
因其為亙古所有者、七毋憶我幼時之罪、及愆尤、
主依爾之恩、為爾之善心、而紀念我、八主係善及

公義者、故訓示罪人于道路、^九導謙遜者於義德、以己之道訓之、^十主之諸途、皆係恩及誠實為遵守其誠約、及所啟示者、^{十一}主歟、藉爾之名、赦我之罪、以其為重大者、^{十二}孰為敬畏主者、主將示之以當擇之道、^{十三}其靈將處於福、其裔將嗣地、^{十四}主之奧秘、屬於敬畏之者、而以其誠約顯示之、^{十五}我注目恒望主、因其提出我足於網、^{十六}主歟、眷顧我、矜憐我、因我孤獨且窮苦、^{十七}我心之憂患益多、拯出我於患難、^{十八}俯鑒我之困苦及勞瘁、而赦我之諸辜、^{十九}試觀我之讐仇何其多、而伊等忿憤（zhi/𠄎、/音志，zi³）我何其深、^{二十}護我靈而救之、毋使我因倚恃爾而被羞、^{二十一}願真正保護我、因我倚望爾、^{二十二}上帝歟、救以色列於其諸憂苦。

第二十五聖詠

^一主歟、伸我冤、因我依真正而行、我倚上帝、故將弗搖動、^二主歟、驗我察我、融洽我腸腑及心、^三蓋爾之恩、於我目前、而我已行於爾之真理、^四我未曾與虛妄者同坐、亦弗願與奸猾者偕行、^五我已疾奸惡者之黨、亦不願與無道者偕坐、^六主歟、

我將以無罪盥潔我手、而周行於爾之壇、^七為能高聲讚頌爾、爾傳揚爾之諸奇蹟、^八主歟、我曾愛慕所居之處、及爾光榮所在、^九毋陷害我靈同于罪人、毋喪我生命同於殘暴者、^十伊等手中係兇惡、其右手滿賄賂、^{十一}至我則依真正而行、主歟、救我、矜憐我、^{十二}我足立于正道、爾於諸會中將讚揚主。

第二十六聖詠

^一主係我之光明及救我者、我孰畏、主係我生命之堅固、我孰畏、^二若惡者我之仇敵、欲噬我之軀、而進攻我、伊等將躓而仆、^三若有軍列陣來擊我、我心亦弗懼、若征戰於我、我亦有倚恃、^四我所曾祈之主、所求者乃一事、第使我處於主之室至終、得見主之榮美、及常往其聖堂、^五因我患難之時、伊或將護蔽我於其幕中、將隱我於居之秘處、而升舉我於磐山上、^六其時我首、或將昂於環我之仇敵上、而於其幕中、我將獻讚頌之祭、我將歌頌於主前、^七主歟、聞我呼籲之聲、矜憐我而聆之、^八我心稱爾所言、爾儕當尋我面、主歟、故我將求至爾面、^九毋隱爾面于我、毋

以怒而棄爾僕、爾係曾佑助我者、上帝救我者、毋棄我、毋遺我、⁺蓋我父母曾遺我、而主將納之、^{十一}主歟、訓示我以爾途、因我之仇讎、而導我于正直之路、^{十二}毋付我于我諸仇敵之手、以遂其意、蓋起妄證者、於我而極憎惡之、^{十三}然我信必得見主恩、於生命之地、^{十四}爾當冀望主、爾須勇、須固爾心、而冀望主。

榮光讚詞

第二十七聖詠

^一主歟、我籲稱爾、爾係我之堅堡、毋緘默於我、恐因爾之緘默、我即似入於墓者、^二我呼籲於爾、舉我手向爾聖堂之時、聆我祈禱之聲、^三毋害我偕惡人及行不義者、係與相近者、談和睦語、於其心乃藏陰惡者、^四求據其所行、及其所為之惡、而報應之、據其手所作者、以報之、依其應受者、以償之、^五因其不顧主所行、及主手所為者、故伊將敗壞之、而弗建立之、^六主宜受讚揚、因伊已聞我祈禱之聲、^七係我之力、我之盾、我心曾冀望之、伊即佑助我、我心乃歡暢、而我宣

揚之以歌頌、^八主係其民之力、及為其傳油者之保障、^九祈救爾之民、賜福於爾之嗣業、牧管之、升舉之、直至永遠。

第二十八聖詠

^一上帝子等當獻於主、以榮光恭敬獻於主、^二以榮光獻於主之名、拜主於其榮華之聖所、^三主聲在水之上、榮光之上帝、發雷、主處於洪水之上、^四主之聲係震、主之聲係威嚴、^五主之聲折斷松柏、主折斷黎巴嫩山之松柏、^六使其踴躍如犢、使黎巴嫩錫利汶山如稚兕、^七主之聲、擊火之焰、^八主之聲震曠野、主震動喀疊斯之野甸、^九主之聲驚麋（yōu/一又/音優，jau¹）鹿生子、及震露出林樹、而於其堂內、莫不顯揚其榮光、^十主曾於洪水之上、將坐而為君世世、^{十一}主將賜能力於其民、主將降平安之福於其民。

第二十九聖詠

^一主歟、我將揚譽爾、因舉升我、亦弗容我之仇讎勝我而喜悅、^二主我之上帝、我呼籲爾、爾即

療我、^四主歟、爾曾出我靈、由地獄中、甦我、不使我入於墓中、^五主之諸聖者、宜歌頌之、讚美其聖名、^六蓋其怒祇片時、而其恩乃於一生、夜間雖泣、而至朝即歡悅、^七我於享安之時、曾自謂永弗搖撼、^八主歟、以爾之恩堅固我山、然爾以掩面、我則驚懼、^九其時我呼籲於爾、祈禱於我主曰、^十使我入於墓、流我血、有何益、塵土豈能讚美乎、抑豈能傳揚爾之真理耶、^{十一}主歟、聆我而憐之、主歟、佑助我、^{十二}時爾曾易我哀哭為踴躍、解我之哀服而束我以歡欣、^{十三}我靈當稱揚於爾、而不緘默、主歟、我之上帝、我將永遠讚美爾。

榮光讚詞

第三十聖詠

^一主歟、我倚恃爾、毋使我羞愧至永遠、而以爾之義救我、^二側爾之耳於我、爾速救拔我、為我而作保我之磐石、為我投歸之處為救我、^三因爾係我之石山、為我之保障、因爾之名、導我及治我、^四引出我於暗設之網、因爾係我之能力、^五我以我靈付

於爾手、主誠實之上帝歟、爾曾屢救我、
七我疾凡敬奉虛妄之偶像者、而惟倚恃主、八我將
於爾之恩而歡樂、因爾垂顧我之患難、知我靈之
苦、九弗付我于仇讎之手、而著我足於綽裕處、
十主矜憐我、因我困狹、我目及心腹、因憂鬱而
已枯矣、十一蓋我之生命、因憂苦而衰頹、我壽因
感歎亦然、我力因我之罪而消乏、而我骨枯矣、
十二因我眾仇敵至、我於鄰近間被辱、而為相識者
所懼、遇我於衢者避之、十三我為人心所忘如死
者、如已壞之器、十四蓋我聞有若許人譏謗、於
四周有驚惶、以伊等合議攻我、及謀拔我之故、
十五主歟、我乃冀望爾、我謂爾乃我之上帝、十六
我之時日在爾之掌中、救我于我仇讎及窘迫我者
之手、十七耀爾光面於爾僕、以爾之恩而救我、
十八主歟、毋使我因籲爾而蒙羞辱、其無道者願其蒙
羞、而默沉於地獄中、十九願其虛妄之口、向義人談
驕傲、藐視之惡言、願箝閉之、二十爾之恩惠、爾所
為畏爾者所存、及為倚恃爾於人裔之前者、所備
何其多、二十一爾護庇之於爾面之蔭、防於人之擾亂、
藏之於幕下、防口舌之詆毀、二十二我讚揚主以其顯奇

恩於我、在鞏固之城中、^{三三}我驚惶之時、謂我已見
擯於爾之目前、乃我籲爾時、爾曾聆我祈禱之聲、
^{三四}諸義者宜愛主、主護心誠者、而於傲慢者報之有
餘、^{三五}凡賴主者、可放膽而固爾之心。

第三十一聖詠

^一福哉、其過得赦、其罪蒙寬者、^二福哉、
主不以為罪、其心無詭詐者、^三我緘默之時、因每
日悲歡、我骸已衰朽、^四因爾之手、晝夜重壓於
我、我之鮮潤消化、如於夏日之旱乾、^五然我曾
承認我罪於爾、而弗諱我之愆尤、我謂我將呈告
我之罪於主前、爾解脫我違失之罪、^六以此諸義
者、乘便時、將禱於爾、而洪水既汎溢、亦不至
其身、^七爾為我之幘幪、爾護我於憂難、爾環我以
解釋之樂、^八主謂我將訓爾、引置爾於當行之途、
我將臨至爾、我目鑒顧爾、^九爾曹毋似馬騾之愚、
必以轡以銜約束之、而馴於爾者、^十罪人必多憂
難、而其倚望主者、則以恩環之、^{十一}爾曹義者、
當歡樂於主、凡心正直者、須慶賀。

榮光讚詞

第五分 第三十二聖詠

一義者、爾儕必欣忭于主、正直者、合當讚頌、二爾儕以琴讚頌主、以十絃之琴歌頌之、三以新歌頌之、以調和及歡呼頌之、四因主之言係正直者、其諸所行、乃誠實、五伊喜秉公及審判、主之諸恩徧於地、六以主之言、諸天造成、以其口之氣、全天軍以成、七伊聚海水如壘、藏深淵于藏所、八普地宜敬畏主、諸處於天下者、應戰競於伊前、蓋伊一言而即成、一命而即有、九主破敗異邦人之謀、消諸異民之逆計、滅諸王之策、十惟主之謀、立於世世、以其衷之意於代代、十一以上帝為其主、乃伊選之為其嗣業者、其民誠福、十二主自天鑒觀、而見諸人子、十三自其所坐之寶座、顧視處於地之眾、十四伊造成伊等之心、而鑒察其諸行事、十五國君弗克獲救、以眾軍勇士、弗能保以大力、十六以馬為救、不可恃以大力、亦弗能救、

^{十八}其諸敬畏主、並冀其恩寵、^{十九}及望脫伊等之靈於死、保育伊等於饑時者、主目鑒顧之、^{二十}我儕之靈冀望主、伊為我儕之佑助及護衛、^{二十一}因伊而我儕之心歡樂、蓋我儕曾倚恃其聖名、^{二十二}主歟、以我儕冀望爾、祈爾恩臨於我儕之上。

第三十三聖詠

^一我將時時讚美主、讚美伊之言、恒在我口中、^二我靈以主為己之聲譽、和遜者聞之而將死、^三爾儕偕我讚揚主、同以其名聲揚之、^四我曾尋求主、伊聆納之、而於諸艱難救之、^五有人仰其目于伊、即被光照、而其面將不至於羞、^六斯貧人號呼、主即聞之、而救其諸患難、^七主之天神、環衛敬畏主者、而救援之、^八爾儕嘗試之、即將知主何等仁慈、冀望伊之人誠有福、^九諸聖者宜敬畏主、因敬畏伊者、諸無缺乏、^十稚獅時受苦而餒、而尋主者諸善無缺、^{十一}子弟等就我而聽之、我將訓爾曹敬畏主之道、^{十二}孰欲存活而喜長壽、為見享福者、^{十三}嘗謹其舌於惡、緘其口於奸猾之言、^{十四}爾當避惡行善、尋和平而隨從之、^{十五}主之

目眷顧義者、其耳聆其呼籲、^{十七}至其行惡者、主面對之、為銷其名於地、^{十八}眾義者呼籲、主即聞之、而救之於諸憂難、^{十九}心傷痛者、主與之近、其謙卑者、主將救之、^{二十}義者有多憂難、而主無不拯救之、^{二十一}伊護其百骸、至其一亦不傷折、^{二十二}惡者以惡當被滅、而憎有義者當消亡、^{二十三}主必救其僕之靈、而冀望伊者、至一亦不亡。

榮光讚詞

第三十四聖詠

^一求主判彼與我訟者、擊敗其與我戰者、^二以盾及甲、起而為助我、^三擊刀禦彼逐我者、求向我靈曰、我乃救爾者、^四願覓我靈者蒙羞受恥、其謀害我者、退而被辱、^五願伊等如糠秕、飛揚於風、而主之天神驅逐之、^六願伊等之途、暗且滑、而主之天神追之、^七蓋伊等無故暗設網羅、無故掘阱、為陷害我靈、^八願其倉促被害、反自罹其暗設之網、而陷於內為滅、^九至我靈將悅於主、喜于伊所施之救、^十我諸骸將曰、主歟、孰能如爾救懦弱者於強悍者、救拔窮苦貧寡 (jù/ㄐㄩˋ /音具, geoi⁶)

者於劫奪者、^{十一}妄證我者起、而以我所弗識之情事、責問我、^{十二}其以惡報我之善、致使我靈孤獨、^{十三}于伊等病時、我著哀服、以齋戒苦我靈、而我之祈禱、翻歸於我腹內、^{十四}我曾待之如我友如弟兄、我憂行俯首如失恃、^{十五}而我躋時、伊等則樂而集、誹謗者曾為敵我、不知何以謗我不息、^{十六}偕虛偽識笑者切齒於我、^{十七}主歟、觀望將至何時、脫我靈於其兇惡、救我靈於諸獅、^{十八}我將讚稱爾於天會中、讚美爾於眾民中、^{十九}為毋使無故讎我者、勝我而悅、無故疾我者、彼此瞬目、^{二十}蓋伊等所言者、非和平、乃于地上喜和平者為計謀、^{二十一}騰口向我曰、嘻嘻、我儕已目見矣、^{二十二}上帝歟、爾已見矣、毋緘默、主歟、毋離我、^{二十三}我之主歟、我之上帝、振起而寤、為行我之審判、我之訟詞、^{二十四}主歟、我之上帝、以爾之公義審判我、毋使伊等勝我而悅、^{二十五}毋容其心謂嘻、誠如我儕之心願矣、毋使其謂我儕已啖之矣、^{二十六}願幸我災者、被羞而恥、凡向我自誇大者、被愧而受辱、^{二十七}為其冤得伸者、願其歡呼慶賀、而嘗謂賜其僕平安之主、願其至大、^{二十八}我舌將頌主之公義、而每日讚頌爾。

第三十五聖詠

二惡者之無道於我心、謂其目前無上帝之謂、
三蓋彼自諂自欺、於其目似省察其罪為疾之、四其口
所言、惟不實及詭詐、不願覺悟以行善、五其於榻
上而謀無道、自立於不善之途而不憎惡、六主歟、
爾之恩寵至於天、爾之真實直至雲霄、七爾之義似
上帝之山、爾之命判如大淵、爾保護人及牲畜、
八上帝歟、爾之恩惠何其寶貴、諸人之子、於爾
翼之蔭而安、九饜飫爾室至腴、爾以爾溪之甘味而
飲之、十蓋生命之源在爾、而我等於爾之光見光、
十一主歟、恒賜恩於承認爾者、及爾之公義、于行正
直者、十二毋使傲者之足蹴我、及罪人之手揮我、
十三彼為惡者、顛躓、被推仆而不能復起。

榮光讚詞

第三十六聖詠

一毋妬奸惡者、亦毋嫉犯罪者、二蓋伊等如
草、將被刈、如青草將萎、三當冀于主而行善、
處於地而守真理、四爾喜悅於主、而伊將滿爾衷所

願者、^五以爾之途付於主、且倚恃之、而伊必成之、^六必著顯爾之義德如光、標爾之真實如午日、^七爾當歸服主而恃之、毋妬奸惡之人、其謀有順適者、^八須息爾之怒、遺爾之憾、毋妬伊等、致自為惡、^九蓋為惡者必見絕、惟恃主者、將得土、^十不久惡者當亡、爾觀其所即無矣、^{十一}其謙遜者、則將嗣土、而極享太平、^{十二}惡人謀攻義人而切齒、^{十三}主哂之、因見其日將屆矣、^{十四}諸惡人掣劍張弓、欲摧仆苦及貧者、而刺貫行正道者、^{十五}其劍反自刺其心、其弓必為斷折、^{十六}義者雖少、乃勝惡者之富、^{十七}蓋惡者之筋、必為斷折、其義者、主扶之、^{十八}主知諸無罪者之日、而其嗣業將永存、^{十九}其於患難之時、弗至被羞、於饑餓之日、將獲飽飫、^{二十}罪人必滅、主之仇讐、如羔之脂膏消滅、將潰散於煙氣、^{二十一}惡者借貸而不償、其義者則矜憐且施予、^{二十二}蓋受伊之祝者、將得土、其為伊所詛者、將夷滅、^{二十三}主定斯人之足、而樂其所行之途、^{二十四}將躡而弗致顛僕、因主以手扶之、^{二十五}我自年幼今至老、未曾見義者被擲、而其後嗣丐食、^{二十六}義者比日矜憐且借予、

而其後嗣將受福、^{二七}爾當避惡行善、即永生、^{二八}蓋主愛公義、而不遺其聖人、伊等永被護、其惡者被逐出、而其後嗣將滅絕、^{二九}諸義者將得土、而永居之、^{三十}義人之口出智慧、其舌談公義、^{三一}伊以上帝之法、存於其心、而其足弗至搖撼、^{三二}惡人窺伺義者、而欲殺之、^{三三}但主不付之於其手、而于審判伊之時、不治以罪、^{三四}爾宜恃於主、守其道、伊將升舉爾、使爾嗣土、其惡者見絕時、爾將見之、^{三五}我曾見惡者之威大、漫廣如根深之茂樹、^{三六}彼一過即亡、我尋之而不得、^{三七}爾當觀純潔者、視公義者、蓋似此之人、其結局必安平、^{三八}其惡者將盡被滅、無道者之結局、係滅絕、^{三九}義者之救、由主而來、於其患難時、主係其保障、^{四十}主將助之救之、主將護之、於諸惡中救之、因伊等依賴主。

榮光讚詞

第六分

第三十七聖詠

主歟、毋以爾赫怒而責我、毋以爾恚（hui/
ㄉㄨˋ ㄨㄟˋ /音渭，wai⁶）而罰我、因爾之矢、刺入
我體、爾之手、重壓我身、因以爾之怒、我肉軀
無一完全之處、以我之犯罪、我骸內弗安、蓋我
罪踰我首、如重任壓我、以我之狂妄、我瘍腐而
臭矣、我身已屈、我體極曲、終日憂患而行、
蓋我之腰、以火充溢、而我肉軀無一完全之處、
我疲而憊、極呼號、因心綻裂、主歟、我諸
願於爾前、我歎弗能掩蔽於爾、我心踴躍、我
力遺去我、而併我目之光亦無、我親朋以我
之傷、離避之、且我之親遠立、期覓我靈者、
設網、欲我受害者、談我傷亡、而每日思謀計、
然我似聾而弗聞、似不啟口之啞者、是以我
作為如無聞者、如口無可辯者、主歟、蓋我仰
望爾、我主上帝歟、爾必聽我、我曾言仇敵毋

勝我、我足欲動時、伊等於我自誇大、^{十八}我幾欲顛仆、而我憂常在我前、^{十九}我承認我無道、為我罪而痛悔、^{二十}其我之仇敵、生存而愈強、無故疾我者益多、^{二十一}其以惡報我之善者、緣我循善道、而為仇敵、^{二十二}主我上帝歟、毋遠我、^{二十三}救我之主歟、速至而佑助我。

第三十八聖詠

^一我曾自言、我欲戒慎於我諸途、不致因舌而犯罪、惡者在我前時、^二我定箝閉己口、我曾為啞而不語、即良善我亦弗言、而我憂發動、^三我心於我體中發燄、而於我意中起火、我遂以舌始云、^四主歟、求告我以我命之終期、及我日之數、若何、俾我知我生命係何如、^五主歟、爾畀我之日、不過一握、而我之一生、於爾前如無有、誠哉、凡人生皆為虛幻、^六誠哉、人行走如虛影、徒為皇皇、空斂積、不知被誰所獲、^七我今尚何冀望、我之冀望、惟於爾、^八求爾脫我於我諸罪中、而毋使我為愚妄者所恥侮、^九我成為啞者、不啟口、因爾曾如是行、^十祈爾去爾之霹擊於我、因爾所

擊之手、我幾乎亡、^{十二}倘爾以責、罰治人之罪、其美形當如蠹（dù/勿又` /音妒，dou³）所蛀而壞散、人皆虛幻如是、^{十三}祈主納我之禱、聆我之呼籲、視我之淚、毋默、因我係旅客于爾前、亦如我之諸祖、^{十四}祈爾稍寬離我、使我逝世及沒之先、可以安養。

第三十九聖詠

^一我曾切切冀望主、而伊即側俯於我、而聆納我之號籲、^二題我於可畏之深壑、出之泥淖、而置我足于磐石、堅我之步履、^三置我口以新歌、為讚美我儕之上帝、眾將見而敬畏之、且將冀望於主、^四賴主弗向於驕傲者、及偏從虛妄者、其人誠為福、^五主我之上帝、爾所行之事甚多、孰克比於爾、我本願傳述爾之奇蹟、及向我所紀念者、而其數不可勝計、^六爾已不願祭祀、及獻禮、爾已啟我之耳、全燔及潔罪之祭、亦爾所弗欲、^七時我言云、我至書卷中、有為我所紀云、^八我之上帝歟、我欲遵爾之命、爾之法存於我心、^九我曾宣揚爾之公義、於大會中、而不禁我口、主知之、^十爾

之公義、我曾不秘之於我衷、爾之誠信及救恩、我曾傳揚、而不秘爾之恩惠及真實、於大會中、^{十二}主歟、毋吝爾之恩慈於我、願爾之恩惠真實、常護我、^{十三}蓋無數災難已環我、我罪已至我躬、致使我弗能見、及甚至多於我首之發、而我心已離我矣、^{十四}主歟、恩救我、主歟、速助佑我、^{十五}其求滅我靈者、願其蒙羞而被恥、欲害我者、願其被祛而受辱、^{十六}凡向我言者、嘻嘻、願其以被辱而敗壞、^{十七}凡尋求爾者、願其歡樂於爾、其悅爾之救者、願其常言、主實為大、^{十八}我乃貧苦、然主顧念於我、爾係我之佑助、而救我者、我之上帝毋遲。

榮光讚詞

第四十聖詠

^一憐顧貧乏者、其人誠為福、主於其患難時將救之、^二主將護之、保其生命、其在地必護福、爾必不付之使其仇敵稱願、^四其臥病於榻時、主必健之、其病時、爾將其榻改整之、^五我曾言主歟、憐憫我、醫我靈、因我獲罪於爾、^六我之仇敵以惡

言及我曰、其何時將亡、而其名滅乎、^七若有人來見我、則必為妄言、其哀懷不義、出於外及議之、^八疾我者、皆相接耳議我、交謀欲害我、^九韋利阿之言、已至其身、伊仆而不能複起、^十至與我和睦之人、為我所倚恃者、食我餐者、亦舉足於我、^{十一}上帝歟、憐憫我、祈建我、而我將報復之、^{十二}以此我知爾係眷顧我、苟我仇敵弗勝我、^{十三}而爾將保全我、及置我於爾面前、直至世世、^{十四}主以色列之上帝、實當受讚美、永世無盡、阿民阿民。

第四十一聖詠

^一上帝歟、我靈慕向爾、如鹿覓溪水、^二我靈渴于勇健常生之上帝、我何時可至、而朝於上帝面前、^四人每日向我言爾之上帝何在時、我晝夜中即以淚為食、^五我一念及我曾行於大眾中、同進上帝之室、偕慶賀之會、歡樂讚榮時、今即流現我靈、^六我靈何為憂悶、何為惶擾、爾當倚望上帝、因我仍將讚揚救我者、我之上帝、^七我靈憂悶於我、故我憶爾于约旦之地、及耶兒孟、左阿

兒之山、^八以爾諸瀑布之聲淵招至淵、爾之諸水、爾之諸波、皆過我下、^九晝則主將施恩、夜則我歌頌于伊、禱於我生命之上帝、^十我將告於護我之上帝、何為忘我、我何為因仇敵之侮而報憂以行、^{十一}仇敵侮我如擊折我骸、而每日向我曰、爾上帝何在、^{十二}我靈何為憂悶、何為惶擾、爾當倚望上帝、因我仍將讚揚救我者、我之上帝。

第四十二聖詠

^一上帝歟、祈審判我、伸理我訟詞於惡民、救我於詭詐及無義之人、^二蓋爾乃堅固我之上帝、何為棄我、我何為因仇敵之侮而抱憂以行、^三發爾之光、及爾之真實、使其引我導至爾之聖山、及爾之所居、^四我將就上帝之祭壇、至我歡樂之上帝、我之上帝歟、時我將以琴讚美爾、^五我靈何為憂悶、何為惶擾、爾當倚望上帝、因我仍將讚揚救我者、我之上帝。

榮光讚詞

第四十三聖詠

三上帝歟、我儕以已耳聞之、即我儕之祖父傳述于我、我以爾所行之事、于伊等之日即于古時、三以爾手曾滅異邦、而建我祖父、痛折列國而逐之、四蓋伊等非以己之劍得土、亦非以己之臂被救、乃爾之右手、及爾之臂、及爾面之光、因爾眷顧之、五上帝我之君歟、爾仍係如前者、賜救於雅各、六我儕偕爾將以角、抵損我儕之仇敵、賴爾之名、將蹴攻我者、七蓋我非我之弓是賴、非我之劍將救我、八乃爾將救我儕於我仇敵、而使疾我者承羞、九我將日日自榮以上帝、永稱揚爾之名、十乃爾已棄我儕、已辱我儕、而弗偕我兵共出、十一使我儕退卻於仇敵、而疾我者劫奪之、十二爾使我儕如羊然、以食之、而散我儕於異邦、十三爾曾無利賣爾之民、而弗增其價、十四爾付我儕被鄰家所侮辱、為環我者所謗所戲、十五以我儕使異邦人以我為諺語、使異民為我搖首、十六每日我之恥辱於我前、十七因侮我訾（zī/ㄗ/音子，zi²）我者之聲、因敵我仇我者之目、而愧恥蒙於

我面、^{十八}此皆臨我儕矣、而我儕乃弗遺忘爾、亦弗踰爾之誠約、^{十九}我儕之心、未曾背卻、我儕之步、未曾離爾之途、^{二十}於爾擊傷我儕在諸龍之區、蔽我儕以死之時、^{二十一}我儕若忘我上帝之名、或舒手向他主、^{二十二}上帝豈弗究此、蓋伊知心之隱、^{二十三}因爾我儕日被殺、視我儕如備屠之羊、^{二十四}主歟起、何為寢、毋永棄、^{二十五}何為蔽之面、而忘我儕之艱苦、及我儕之窘迫、^{二十六}蓋我儕之靈、抑伏於塵、我儕之腸貼於地、^{二十七}起歟、佑助我儕、而以爾恩救我儕。

第四十四聖詠

^一我心湧發良言、我曰、我所歌係君、我舌似迅書者之筆、^二爾較諸人子為極美者、自爾之口湧溢恩、以此上帝祝福予爾至永遠、^三勇毅者、爾以劍及爾之光榮及美麗、^四佩於胯、以此莊嚴、速往乘車、為真理謙遜及公義之故、爾之右手、教爾以奇妙之事、^五勇毅者、爾箭犀利、異邦將伏於爾前、而此箭直中君仇敵之心竅、^六上帝爾寶位、直至永遠、爾國之權柄、係正直之權柄、^七爾好善而

惡惡、是以上帝歟、爾之上帝、曾傳爾以歡悅之膏、勝於爾侶、^九爾衣如沒藥蘆薈肉桂之香、自象齒之殿、^十有悅爾者、諸王之女、列於爾貴嬪中、後立於爾之右、妝以鄂斐兒之黃金、^{十一}處女歟、爾當聽之觀之、側爾之耳、當忘爾之民、及爾之父家、^{十二}君將慕爾之美麗、蓋伊為爾之主、爾宜拜之、^{十三}提爾之女、將攜禮物、及民中之殷富者將祈於爾面、^{十四}君女之榮華、皆係在內、其服以金為繡、^{十五}衣彩服、被引於君前、從後有陪伴之童女、引於爾面前、^{十六}伊等被引、以歡欣踴躍而入於君殿、^{十七}代爾之祖考將有爾之諸子、而爾建之為王君於普地、^{十八}我將使爾名萬世弗忘。

第四十五聖詠

^一上帝乃我儕投避之處、及能力、當憂難之時、速來佑助我、^二是以雖地震、雖山動移於海中、我儕將弗懼、^三任使伊等之波浪發洪聲勝湧、任使因此而出嶽撼搖、^四河流使上帝之城悅樂、即至上者之聖君、^五上帝在其中、其必弗能搖撼、上帝定早佑助之、^六列邦振盪、諸國撼搖、至上

者一發聲、而地即消潰、^八萬天軍之主、偕我儕、雅各之上帝、護保我儕、^九試來觀主之諸事、即其在地所行之災罰、^十其止息戰征、直至地極、折弓斷矛、以火焚兵車、^{十一}爾等且止、而識我係上帝、我於列邦中、必獲敬崇、於地亦有敬崇、^{十二}萬天軍之主、偕我儕、雅各之上帝、護保我儕。

榮光讚詞

第七分 第四十六聖詠

^一萬民皆當拍掌、呼籲於上帝、以歡樂之聲、^二蓋至上之主、乃係威嚴、乃係普地之大君、^三其以異民、降於我儕、以諸外族、服於我之足下、^四伊為我儕選嗣業、即其所愛之雅各之榮光、^五上帝偕歡呼之聲、而上升、主偕角聲而升、^六當歌頌我儕之上帝、歌頌兮、歌頌我儕之君、歌頌兮、^七蓋上帝乃普地之君、宜以智慧讚頌之、^八上帝為君於列國、上帝坐其聖寶座、^九列邦之君、皆聚集于亞伯拉罕之上帝所屬之民、蓋地之盾屬上帝、伊乃舉之其上。

第四十七聖詠

二主係至大、宜受讚揚於我儕、上帝之城、于伊之聖山、三錫安山係美陵、乃普地之喜樂、其山陰係大君之城、四上帝於伊之居處顯其為護、五蓋諸王會集而過、六見之而驚異、心擾亂而遁、七伊等戰兢、受苦如產婦、八爾以東風、壞發兒錫斯之舟、九我儕如昔所聞者、今則得見之於天軍之主之城、即我儕上帝之城、上帝將起而堅固之至永遠、十上帝歟、我儕思爾恩於爾之堂中、十一上帝歟、如爾之名讚美、直至地極、爾之右手、滿以公義、十二主歟因爾之公判、錫安山宜歡欣、猶大之女當喜樂、十三爾曹宜環錫安山而周行、數其譙樓、十四思其雉堞、觀其宮室、為可述之於後代、十五蓋此上帝、乃我儕之上帝、直至永遠、伊將導我等至終。

第四十八聖詠

二萬民皆宜聽之、天下所居者、皆宜聆之、三無論貴賤貧富者、四我口將發慧言、我衷出明智、五我將側我之耳聽譬喻、我將以琴晰我之隱

語、^六我遇患難、而我途之惡將環我時、我有何懼云、^七爾儕恃己之力誇其財多者歟、^八人弗能救其弟兄、亦弗能贖之於上帝、^九因贖其靈之價實貴、^十人常存於地而永不見墳曠者、決未之有、^{十一}人人皆見、彼智者必亡、愚者及昧心者亦滅、而遺貨財予他人、^{十二}伊等思其家永存、其宅留於世世、而稱其田以己之名、^{十三}但人於榮華、不能常存、將類常亡之畜、^{十四}此道係伊等之愚妄、雖在其後者、亦然之、^{十五}伊如羣羊被錮於地獄、而死將牧之、詰旦、義者將主之、其力將消、而其居係墓、^{十六}惟上帝接納我時、將救我脫我靈於地獄之權、^{十七}或有人日殷富、其家倍增榮華、而爾毋疑慮、^{十八}蓋其亡時、俱弗能攜帶之、而其榮華亦弗能隨之、^{十九}雖其于生存時自誇其靈、而人見爾受用誇讚爾、^{二十}但伊必歸至其祖父永不見光之處、^{二十一}人於榮華而愚者、將類常亡之畜。

榮光讚詞

第四十九聖詠

一萬主之上帝主宰、發言召地、從日出處、直至入處、^二上帝自錫安、即至美之錫安而顯、^三我儕之上帝臨至、而非靜默、其前有火燬燼、其四周有烈風、^四伊自上呼天及地、為審判其民、^五謂夫、宜集我之聖人、即藉祭與我盟約者、^六諸天將傳揚其公義、因折獄者乃上帝、^七我民歟、宜聽之、以色列歟、我欲言須聽、欲證實於爾、我乃上帝、即係爾之上帝、^八我非因爾之祭祀而譴爾、蓋爾之全燔、常在我面前、^九我不欲取犢牛於爾之家、或山羊於爾之院、^十蓋林中之諸獸、千山之諸牲、皆屬我、^{十一}我知山之諸禽、曠野之獸、亦在我前、^{十二}我或饑弗告爾、因世界及其中所載者、俱屬我、^{十三}我豈食牡牛之肉、或飲山羊之血、^{十四}爾宜以讚頌獻於上帝、以誓願償於至上者、^{十五}爾於憂患時、宜祈我、而我必救拔爾、以此、將讚榮我、^{十六}上帝向罪人曰、爾何為、傳我之法律、抑置我之誠約於爾口中乎、^{十七}而自疾我之教命、且以我言棄於爾背後、

^{十八}爾遇賊則與之相合、且遇奸邪、則與之偕、
^{十九}爾啟口出誣言、爾舌結詭詐、^{二十}爾坐而讒毀
爾之弟兄、亦謗爾妣之子、^{二十一}爾既行此、我曾緘
默、爾則意我亦與爾同、我將罰爾、指陳爾罪、
置於爾目前、^{二十二}凡忘上帝者、宜悟此、否則恐我
挾奪爾曹、而無人能救、^{二十三}以讚頌獻於我者、
係敬我之人、謹慎其道者、我將示以主之救。

第五十聖詠

^三上帝歟、因爾大仁慈矜憐我、以大憐惠、
刪除我諸愆尤、^四屢洗濯我於愆尤、潔我於罪、
^五因我認己之諸愆尤、而我罪惡常在我目前、
^六我獲罪獨於爾、行惡於爾目前、致爾所擬係至
確、及爾審判係至公、^七乃我被孕於罪、而我母生
我亦於罪、^八爾所曾愛乃心之真實、而爾於我表
顯智慧於我、^九今求灑我以淨香草、則我將被潔、
濯我則我白於雪、^十許我聞喜樂、則爾所折之骸
將踴躍、^{十一}轉爾面於我諸罪、刑除我諸愆尤、
^{十二}上帝歟、造潔淨心於我內、復新正氣於我衷、
^{十三}毋屏我於爾面、毋收回爾聖神於我、^{十四}以爾救

我之樂還我、而以宰神堅定我、^{十五}我將教化無道者於爾之諸道、而惡者將歸於爾、^{十六}上帝救我之上帝歟、赦免我血罪、而我舌將稱讚爾之仁義、^{十七}主歟、開啟我口、而我唇將發讚揚於爾、^{十八}我願獻祭、而爾弗願之、全燔之祭爾亦不悅、^{十九}主所享者、乃憂傷之神氣、上帝歟、痛悔謙卑之心、爾將不輕藐、^{二十}主歟、以爾寵眷、垂恩惠於錫安、而建耶路撒冷城堞、^{二十一}時爾乃將忻悅、公義之祀祭獻全燔、其時人將置諸犢於爾祭壇。

榮光讚詞

第五十一聖詠

^三有能力者歟、何為以兇惡自誇張、上帝之恩常偕我、^四爾舌計陷害、詭詐者歟、爾舌如薙（ti/去一、/音替，tai³）刀之利、^五爾喜惡逾於善、樂謊言越於真實、^六譎舌者歟、爾喜諸陷害之談、^七以此、上帝將敗壞爾至極、仆爾及刪除爾于爾之居宅、抉去爾根、於生活者之地、^八義者將見之而懼、而笑之雲、^九此人非以上帝為己之力、乃恃己

之殷富、而堅固於惡、^十至我乃如青橄欖樹、於上帝之殿中、我倚上帝之恩慈、永無窮、^{十一}因爾所作、我當永稱揚爾、我將冀望爾之名、因其善於聖人之前。

第五十二聖詠

^二愚悞者、心謂無上帝、伊等心壞矣、已行可惡之事、無一為善者、^三上帝自天、俯觀人子、為察其中有認識及覓求上帝者否、^四乃皆偏歧、路均朽敗、無行善者、即一亦無、^五凡作惡者、吞我民如餌者、弗祈求上帝者、豈皆不明悟、^六無可懼之處、伊等皆懷驚、因上帝將折散攻爾者之骸、爾將使伊等致羞、因上帝已棄之矣、^七孰自錫安而賜救于以色列人、上帝救回被擄之民時、雅各將歡欣、以色列人亦將快樂。

第五十三聖詠

^三上帝歟、以爾之名救我、以爾之力伸理我、^四上帝歟、聽我之禱、聆我口所言、^五因外人起而攻我、強暴者覓我靈、而伊等不置上帝於其面

前、^六斯乃上帝佑助我、主扶持我靈、^七伊將報我仇敵之惡、求以爾之公義滅之、^八主歟、我將盡心獻祭於爾、將稱揚爾之名、^九因其係美善、因爾曾救我於諸患難、而我目見我之諸仇敵。

第五十四聖詠

^三上帝歟、聽我之祈、毋蔽面於我之禱、^三聆我聽我、我於憂愁而呻吟、^四因仇敵之聲、及惡者之逼迫、而惶擾、因伊等以諸惡誣我、及以忿憤（zhi/止、音置，zi³）而逆我、^五我心搖動於我衷、臨死之懼已踞我、^六驚駭至我、畏懼纏我、^七我曾言、孰或予我鴿翼、我即飛騰、而獲平安、^八遠趨而處於曠野、^九速避旋風及烈風、^十求主潰亂伊等、而變分其舌、因我見強脅、及爭競於城內、^{十一}伊等晝夜環行於城上、而其中有毒餓禍亂、^{十二}殘害在其中、誑騙詭詐、弗離其衢市、^{十三}非若仇敵詈我、我則忍耐之、非若嫉恨我者誇勝於我、我則避藏之、^{十四}然爾乃與我同者、為我友朋、係我親契、^{十五}與我常談心者、偕我同登上帝堂者、^{十六}願死至伊等、願其生墜於地獄、因諸

惡在其宅、於其中間、^{十七}至我將呼籲上帝、而主將救我、^{十八}晨昏及午、我將祈禱及呼籲、而伊將聞我之聲、^{十九}而將救我靈於攻我者、而付平安、因伊等實多、^{二十}上帝將聽之、諸世前在者壓伏之、因伊等不悔改、而不畏上帝、^{二十一}伊等伸手與其和睦者、已爽其約、^{二十二}其口滑稽於膏、而其心銜恨、其唇柔如油、而係白刃、^{二十三}以爾憂慮、當付託於上帝、而伊將扶持爾、伊終不致正直者搖撼、^{二十四}上帝歟、爾將墜之於敗壞之阱、兇暴行詐者、不獲及半生、而我倚望於爾。

榮光讚詞

第八分 第五十五聖詠

^一上帝歟矜憐我、蓋人欲啖我、每日攻我、且逼迫我、^二至上者歟、我眾仇敵每日覓啖我、蓋攻我者眾、^三我懼時、惟倚賴爾、^四我以上帝之故、欲稱譽其言、我倚恃上帝、是以弗懼、肉軀其如我何、^五伊等每日變易我言、其所思皆乃害我者、

七伊等焦聚暗覆、及視我之步趨、為捉我之靈、
八豈伊等將脫於惡報、上帝歟、以爾之怒降仆諸
民、九我之流離、爾曾數之、我淚納於爾之瓶、
豈未書於爾之冊、十我呼籲於爾時、我諸仇敵即
退返、以此我知上帝貼於我、十一我以上帝之故、
欲稱譽其言、以上帝之故、故稱譽其言、十二我倚
恃上帝、是以弗懼、人其如我何、十三上帝歟、
我之諸願設於爾者、我當償、我將獻讚美於爾、
十四因爾曾救我之靈於死、拭我目之淚、護我弗失
足、為我於生活之光閃、行走於上帝前。

第五十六聖詠

一上帝歟、矜憐我、矜憐我、因我靈倚望於
爾、我將蔽於爾之翼蔭、以待患難之過、二我將呼
籲無上之上帝、于施恩於我之上帝、三伊自天將
佑我、而救之、將恥覓啖我者、上帝將施恩及誠
實、四我靈於諸獅中間、我臥於噴火焰者中、人子
之中、其齒如矛矢、而其舌如利劍者、五願上帝升
於諸天之上、而爾之榮光滿於普地、伊等曾設網
羅、為我之足、而我靈受困、曾掘陷阱於我前、

而已墜其中、^八我心已定、上帝歟、我心已定矣、
我將歌且頌、^九我之讚揚當始、我之琴瑟當作、
我將早起、^十主歟、我將讚頌爾於萬民中、歌頌爾於
異邦間、^{十一}蓋爾之恩高於天、爾之真實、至於雲表、
^{十二}願上帝升於諸天之上、而爾之榮光滿於普地。

第五十七聖詠

^一理刑者、爾曹談論係真實乎、人之子孫、爾
曹審判誠係公義乎、^二但爾曹心中、乃思謀於
惡、以爾手於地之暴虐、置於權衡、^三惡者自生時
即離道、自母妊中即昏迷、而妄言、^四伊等之毒、
似蛇毒、似聾蛇之塞耳、^五弗聽妙術者之聲、即
絕妙咒術者之聲、亦弗聽、^六上帝歟、祈折其口之
齒、主歟、壞諸獅之頰、^七願伊等被滅如瀉水、曳
滿發矢時、令其如被折者、^八願令其滅、如銷化之
蝸牛、弗獲見日如婦滑胎之子、^九伊等之釜、於棘
薪未炊熱之先、願其被旋風吹散之、^十義者、見
其受報將歡欣、將濯其足以惡者之血、^{十一}時人將
云、義者誠有果報、地上誠有上帝行審判。

榮光讚詞

第五十八聖詠

^一我之上帝歟、救脫我於我之仇敵、護我於
攻我者、^二脫我於行惡者、救我於血暴者、^三蓋伊
等窺伺我靈、主歟、強悍者集聚欲攻我、非因我
之愆尤、並非為我之罪、^四我雖無辜、伊等趨集武
備、祈爾作而佑我、試觀之、^五主歟、天軍之主、
以色列之上帝歟、願主悟起、而臨治萬邦之民、
毋恕一無道逆惡者、^六伊等暮歸、號如犬、環城而
行、^七茲伊以舌吐譏謗、其口含劍、思孰能聽之、
^八主歟、爾乃將哂之、將愧彼萬邦、^九力屬伊等、
我乃歸服爾、因上帝乃我之護佑、^十我之上帝施
恩於我者、將先我、上帝使我見我之仇敵、^{十一}毋
殺之、恐我民忘之、主歟、我等之保護、以爾之
能力、離散之、降抑之、^{十二}其口之言、係其口之
罪、因伊詛詈及妄言、願其以驕傲自被拘、^{十三}求
以怒離散之、以致消無、使其知上帝統轄雅各直
至地極、^{十四}伊等暮歸、號如犬、環城而行、^{十五}往
來欲求食、而枵(xiāo/ㄒ一ㄠ/音梟，hiu¹)腹終夜、
^{十六}至我將歌頌爾之權能、自清晨宜揚爾之恩、

蓋爾於我患難時、曾為我之護佑投避處、^{十八}我之力我將讚頌之、蓋上帝乃我之護佑、施恩於我之上帝。

第五十九聖詠

^三上帝歟、爾曾離棄我儕、敗壞之而發怒、求爾轉向於我儕、^四爾曾震地而壞之、祈補之、蓋因地搖動、^五爾曾嚙爾民以苦、飲我儕以驚惶之酒、^六求爾賜旗旛於畏爾者、使其為真理樹之、^七使爾親愛者獲救、以爾右手、救而聽我、^八上帝於聖所言曰、我將獲勝、分錫葉木而度量莎克豁福之谷、^九噶刺阿德屬我、瑪納錫阿地亦屬我、耶福咧木乃我首之堅固、猶大乃我之權衡、^十摩阿烏為我之浴桶、我將舒我靴於耶鐸木、於斐利斯提木地、爾可歡籲我、^{十一}孰將引我進鞏固之城、誰能導我至耶鐸木、^{十二}豈非上帝乎、曾棄我、而今不偕我兵出者乎、^{十三}祈賜助我等於狹難中、蓋因人之護佑、乃虛枉者、^{十四}倘偕上帝則我儕將顯氣力、伊必降抑我儕之仇敵。

第六十聖詠

三上帝歟、聆我之呼籲、聽我之祈禱、三我以哀之憂傷、自地極呼籲於爾、引我升我所弗克至之磐石、四因爾係我之投避處、防仇敵之堅固保障、五我當居於爾之處所、而安於爾翼下之蔭蔽、六因爾上帝、曾聞我所許之願、而賜我以懼爾名之嗣業、七求爾增加君之日、延其年於世世、八願其永存於上帝面前、使恩及真實護佑之、九是以我將頌爾名、至永世、而日日將滿我之願。

榮光讚詞

第六十一聖詠

三我靈、獨於上帝而安、我之救、自伊而獲、三伊係我之堅固、獨係我之救濟投歸處、我即不復動搖、四爾曹逼迫人將至何時、爾曹皆將仆之、如傾欹（qī/ㄑ一/音崎，kei¹）之牆及頹垣、五伊等惟計謀、以彼自高而擲下、用詭詐以口讚美、而心中詛詈、六我靈、獨於上帝而安、因我冀望于伊、

七獨伊係我之堅固、獨係我之救及投歸處、我即將不動搖、^八我以上帝得救及榮、我之能力、我之冀望、乃於上帝、^九民歟、爾曹當常冀望伊、陳爾心于伊前、上帝係我之投歸處、^十諸人子係輕微、諸人子係虛妄、若置之權衡、則較虛空猶輕、^{十一}毋恃強暴、毋以強掠而得意、若貨財增益、爾曹心毋置之、^{十二}上帝曾一言、而我乃二次聽之、能力係於上帝、^{十三}主歟、恩係於爾、因爾依各人所行而報之。

第六十二聖詠

^一主歟、爾乃我之上帝、我自詰且尋求爾、我靈渴向於爾、我肉軀於燥空無水之地憂慕爾、^二欲瞻爾權力及爾榮威、如先見爾於聖所、^四爾之恩寵、逾於生命、我口將讚爾、^五如是我生存時、欲頌爾、以爾名揚舉我手、^六我靈得飽飫如脂油、而我口以歡欣之聲讚美爾、^七係我於榻上懷憶爾于漏下思念爾時、^八因爾係我之扶助、而於爾翼下我將歡欣、^九我靈貼附於爾、而爾之右手扶持我、^十其覓害我靈者、將降於地深處、^{十一}將被

殺於利刃、而為狐所啖、^{十二}惟君將喜樂於上帝、
凡托之而誓者、必被矜誇、因彼妄言者之口、
將被堵塞。

第六十三聖詠

^三上帝歟、於我祈禱之時、聆我之聲、保護
我生命于懼仇敵時、^三匿我於詭詐至計謀、於兇惡
之擾亂、^四伊等曾莫礪其舌如劍、發毒言如張弓、
^五欲於隱僻處、射無罪者、忽射之而弗懼、^六伊
等定於惡意而相謀、暗設網羅、自謂孰能見之、
^七伊等尋察無道之事、屢考核直至人之衷懷、及心
之深處、^八然上帝將以矢射之、而伊等忽將被傷、
^九伊等以其舌自傷、凡見之者將離避、^十眾人將
懼之、傳揚上帝之功、而識係伊所為者、^{十一}其義
者、將以主而歡樂、且依賴之、心正者、皆將以
為榮耀。

榮光讚詞

第九分 第六十四聖詠

二上帝歟、於錫安山、讚頌屬於爾、於耶路撒冷將酬願於爾、三爾聆祈禱、凡血氣者歸附於爾、四惡行壓勝於我、爾將洗潔我等之愆尤、五福哉、爾所選進於爾、為居於爾之庭院中者、我等將饜足以爾之居處、及爾聖堂之美富、六上帝救我者、以公判可畏者、為居地極及遠處於海之人所冀望者、七以爾力建山、而為權能所繫束者、八平靖海濤巨浪之洪聲、及諸邦之擾亂者、聽我等、九居地極者、將敬畏爾之奇事、晨昏之時、爾將命之讚揚爾、十爾眷顧厥土、飲足其渴、而以豐盛沃之、上帝之溪盈水、爾備穀糧、因其設備如此、十一爾灌溉其田渠、平其土塊、以雨滴潤柔之、而降福以發萌、十二爾以己恩冠歲、爾步履俱垂膏、十三即垂於曠野之壤、而諸邱陵以喜樂繫束之、十四平原以羣牲鋪滿、田野以穀被滿之、皆歡欣而歌頌。

第六十五聖詠

三坤輿、爾宜歡呼於上帝前、歌頌其榮名、且以光榮及讚美歸於伊、
三宜向上帝曰、於爾行事而威嚴何其大、因爾鴻能、爾仇敵將降服於爾、
四至上者、坤輿應拜於爾、歌頌爾、歌頌爾名、
五爾曹來視主之行事、乃施予人之子、係威嚴者、
六伊變海為陸、人步履過河、於彼、我儕為伊而喜樂、
七伊以宏能永宰之、使目鑒察諸國、使叛逆者毋自詡、
八諸異邦宜讚揚我儕之上帝、而傳讚于伊、
九伊曾保生命於我儕之靈、乃弗令我儕之足搖失、
十上帝曾試我儕、爾曾鍊我儕如鍛銀、
十一爾曾引我入于網、曾以重荷置於我儕之腰、
十二置人於我儕之首上、我儕曾入于火水之中、而爾解釋出我儕、
十三我以全燔將入於爾室、我欲償還我之願於爾、
十四即我艱難時、我口所發而我舌所言者、
十五我以肥脂之全燔、與羝（dī/勿一/dai¹）羊之脂香、獻於爾前、祭獻牡牛及山羊、
十六諸謂上帝者、來聽之、我將述爾為我靈所行者、
十七我曾親口呼籲于伊、以我舌讚揚之、
十八若我於

我心中覺有惡、則主必不肯聽我、^{十九}而上帝已聽我、聆我所禱之聲、^{二十}我讚頌上帝、因其未拒我之禱、而弗離慈憐於我。

第六十六聖詠

^一上帝歟、憐憫我等、降福予我等、施爾面之光照我等、^二令爾之途、被知於地、爾之拯救、被知於諸邦、^三上帝歟、願諸邦讚揚爾、列邦均讚揚爾、^四諸邦當歡樂、因爾審判諸幫、以公義轄制地上之各邦、^五上帝歟、願諸邦讚揚爾、列邦均讚揚爾、^六地已產其果、願上帝我儕之上帝、降福予我等、^七願上帝將降福予我等、而地極敬畏之。

榮光讚詞

第六十七聖詠

^一願上帝興起、而其仇敵將散、疾伊者、逋逃于伊之面、^二爾麾散伊等如散煙、願惡人滅亡於上帝面前、如燭被銷融於火、^三其義者將歡欣、喜悅於上帝前、及以悅而致樂、^四宜歌頌我儕之上帝、歌頌其名、稱揚行於諸天者、其名為主、當娛樂

于伊面前、^六上帝於其聖堂中、乃係孤子之父、
嫠婦之伸理者、^七上帝令孤獨者、入處於家、
提出諸囚於縲紲、而其悖逆者、遺於炎野、
^八上帝歟、爾出於爾民先行時、即行於曠野之時、
^九地震至諸天鎔、於上帝面前、併此西奈山化自上帝、
即以以色列之上帝面前、^十上帝歟、爾曾降甘霖
於爾嗣業、其被困時堅固之、^{十一}爾之民曾居於彼
中、上帝歟、因爾大仁慈、而備所需於貧寡者、
^{十二}主將賜言、傳信之女甚多、^{十三}諸興戎之王、
逃之竄之、而處家之婦、分其所掠之物、^{十四}爾曹
分裂於各邊如鴿、其翼布銀、其羽布精金、^{十五}全
能者、潰散諸王於此地、地成白如些泐孟之雪、
^{十六}上帝之山、瓦散山、高大之山、瓦散之山、
^{十七}凡峻嶺、何為嫉視、上帝所欲駐蹕（bi/ㄅㄧˊ、
音畢，bat¹）、而主將永處之山、^{十八}上帝之戎車、
盈千累萬其中、主居於西奈聖所、^{十九}爾曾升于高
區、擄彼擄者、因人受獻物、使叛逆者、有可以
居於主上帝、^{二十}主比日當受讚揚、上帝荷我儕以
重負、而自救之、^{二十一}上帝乃救我儕之上帝、死門
係在全權上帝之掌握、^{二十二}上帝將摧其仇敵之首、

沉溺罪之髮頂、^{二二}主曾言、我欲由瓦散攜回之、由海淵提出之、^{二三}使爾以爾足、併爾犬之舌、澄於仇敵血、^{二四}上帝歟、眾曾見爾之駕行、即我上帝我君之聖駕、^{二五}歌頌者前行、作樂者後從、其中間童女拍鑢鈸、^{二六}歌曰、爾曹出於以色列之種者、應於會中讚頌上帝主宰云、^{二七}彼有冲幼之汶阿明為其君、有猶大之諸君為其主、又有則烏隆之君捏發利木之君、^{二八}爾上帝先思賜爾以力、上帝歟、求爾為我儕所行者堅定之、^{二九}為爾於耶路撒冷之堂、諸王將獻禮物於爾、^{三〇}祈爾制葦澤之野獸、制諸牡牛、於自詡銀錠之眾民之犢、求潰散眾好戰之民、^{三一}諸卿將來自埃及、耶斐鄂批阿將揚手向上帝、^{三二}地上之諸邦、當歌於上帝、^{三三}頌於行在諸天之天上者、伊即以其聲為宏聲、^{三四}爾儕宜榮光上帝、其威嚴乃于以色列之上、其能力乃在雲上、^{三五}上帝歟、於爾之聖所中誠可畏、以色列之上帝、以權以能賜其民、願上帝受讚揚。

榮光讚詞

第六十八聖詠

二上帝救我、因水已至我靈、三我陷於深泥中、併無安立之地、我入於深水、而急流冲我、四我倦於呼籲、我喉已枯乾、我日以冀望我上帝而勞困、五無故而疾我者、於我首之髮、我仇敵無故欲迫我者、已強盛、使我償其所未奪者、六上帝知我愚、我之愆尤、無隱於爾前、七萬軍之主、上帝歟、毋使冀望爾者因我而承羞、以色列之上帝歟、毋使求爾者因我爾被辱、八因為爾而我受誇、及以羞愧蒙我之面、九為我之弟昆、我成為路人、為我母之子、我成為外人、十蓋我因爾室至熱心、蝕我、而謗爾之諸辱、乃墜落於我躬、十一我以靈守齋而泣、以此為我之辱、十二我服以敝衣、乃被人詼戲、十三閑坐闐闐（yīn du/一ㄣ ㄉㄨ/音因都，jan1 dou1）者譏評我、而飲酒者以歌歌我、十四我乃以祈禱赴主、上帝歟、於爾悅時、籍爾之鴻慈、以爾施救之誠實而允我、十五提我出泥中、毋使我陷落、俾我獲救於疾我者及深水、十六毋使急流冲我、毋使深淵啖我、毋使大壑閉口於

我上、^{十七}祈主聆我、因爾之恩寵係善、以廣大之仁慈眷顧我、^{十八}毋覆爾面於爾之僕、因我愁苦速聆我、^{十九}近於我靈而拯之、緣我之仇敵而救我、^{二十}爾知我所受之謗、及恥、及侮辱、而我之仇敵、皆於爾面前、^{二十一}凌辱裂我之心、而我疲極、我望憐憫者、而竟無、冀望安慰者、亦終不獲、^{二十二}以膽食我、於我渴時、以醢（xī/ㄒㄧˊ/音希，hei¹）飲我、^{二十三}願伊等之筵、為其網、其平安之席、為機檻、^{二十四}求使其目昏而不見、使其腰癱至永遠、^{二十五}注爾之怒於彼、使爾怒之燄包環之、^{二十六}使其宅成空曠、而其幕無人居、^{二十七}蓋伊等窘迫爾所已擊者、且於爾所傷而受痛苦者復加之、^{二十八}願爾於其罪加罪、弗使伊等稱義於爾前、^{二十九}令伊等被銷於生命錄、弗得偕錄於義者間、^{三十}至我則窮而受苦、求上帝以爾之輔助、而興起我、^{三十一}我將以歌讚我上帝之名、以頌稱揚之、^{三十二}此將為主所悅、逾於有角蹄之牛及犢、^{三十三}受苦者見此將樂、尋求上帝者、其心當甦、^{三十四}因上帝聆貧者、而弗藐視其所囚者、^{三十五}天地諸海、及其中生動者、當讚美伊、^{三十六}蓋主將救拔錫安建猶大之城、為其民居之

為嗣業、^{三七}伊僕之裔、將定於彼、而慕伊名者徙居之。

第六十九聖詠

^一求上帝速救我、主歟、速佑助我、^二其尋求我靈者、願其蒙羞而被恥、欲害我者、願其被祛而受辱、^四凡向我云嘻嘻者、以譏謗我、而願其退、^五凡尋求爾者、願其將歡樂於爾、其悅爾之救者、願其常言上帝實為大、^六我乃貧苦、祈上帝急救我、主乃我之佑助、而救我者、我主毋遲。

榮光讚詞

第十分 第七十聖詠

^一主歟、我倚賴爾、毋使我羞愧至永遠、^二緣爾之公義、救我拔我、側爾之耳於我、而救之、^三為我作歸處、使我常保之、爾降旨欲救我、我之保、我之障、乃係爾、^四我上帝歟、救我脫於惡者無道及窘迫之手、^五主上帝歟、

爾乃我所冀望者、我自幼所倚恃者、^六我自在娠時、以爾為倚恃、爾出我於母腹、我將讚美爾不息、^七為多人我成為怪異、然爾乃我堅固之冀望、^八願我口滿被以讚美、為我能歌爾之榮光、比日頌爾之威嚴、^九我老時、毋遺我、我力衰頹時、毋棄我、^十蓋我仇敵議論我、伺我靈者、彼此商議、^{十一}謂上帝已棄之、可窘拘之、蓋無救應者、^{十二}上帝歟、毋遠離我、我之上帝、急來佑助我、^{十三}願仇我靈者、被愧恥而消滅、謀害我者、受羞恥及凌虐、^{十四}至我常將冀望爾、而倍加讚頌爾、^{十五}我口將述爾之公義、我口比日將述爾之救拔、蓋我不知其數、^{十六}我將試思主、上帝之能力、記憶爾之公義、即獨爾之公義、^{十七}上帝歟、爾自我幼時曾誨我、而我至今傳揚爾之奇蹟、^{十八}上帝歟、毋遺我至年邁首白、迨我宣爾之能力於此代、及爾之權能於後世、^{十九}上帝歟、爾之公義至極高、爾已行大事、上帝歟、孰堪比之、^{二十}爾以眾厲之苦難、曾加於我、然曾每甦我、復屢出我於地之深壑、^{二十一}爾曾舉我、安慰我、出我於地之深壑、^{二十二}上帝歟、我將以琴頌美爾、以色列之聖者、我將

以琴歌頌爾之真實、^{二二}我歌頌爾時、我口及爾所贖之我靈、併大悅、^{二四}而我舌比日將傳揚爾之公義、因謀害我者、被恥受辱。

第七十一聖詠

^一上帝歟、以爾之判斷賜於君、以爾之公義賜於君之子、^二使伊據公義判爾之民、及審訊時、判爾之貧寡者、^三使山施太平于民、邱陵施以公義、^四使伊將伸民中之窮者、救拔貧者之裔、而壓暴虐者、^五人當敬畏爾於日存月在之時、直至世世、^六伊將降如雨於芟（shān/尸弓/音衫，saam¹）草之地、如雨滴潤於土、^七其時義德者、將興旺、而當有太平之盛、如月之恒、^八伊將宰製自海直至海、自大河直至地極、^九居曠野之眾、將伏於其前、而其仇敵將舐厥垢、^十發兒錫斯及居海島之王、當獻貢于伊、阿喇微阿及薩瓦之君、將獻禮物、^{十一}列王皆當拜伏於其前、而眾民均當奉事伊、^{十二}因伊將救貧之者、及呼籲者、及無助而受窘迫者、^{十三}伊將慈於貧寡者、而救窮乏之靈、^{十四}伊將救脫伊等之靈、於訛詐強暴、而其血、

必獲為珍寶於其目前、^{十五}伊當生活、而人以阿喇微阿之金分予之、恒代其祈禱、而比日讚美之、^{十六}於地當有穀糧之豐、於山上其禾將搖動、如黎巴嫩之林、而於諸城人、將眾多如地之草、^{十七}伊名將受讚美至永世、伊名將歷傳如日之永、地上之萬族、緣其名而當獲福、而萬民將稱讚之、^{十八}上帝以色列之上帝、獨一行奇蹟者、實宜受讚美、其榮光之名、實被讚美、至無窮世、而普地當滿被爾之榮光、阿民阿民。

榮光讚詞

第七十二聖詠

^一上帝何嘉以色列人、即心潔者、^二至我、則足幾傾側及滑、^三故我見惡者之安康、即嫉夫狂妄者、^四因其至終亦未受苦、其力亦健、^五弗預於人之勞瘁、亦弗預於人之擊、^六是以驕傲環之如項圈、其強悍服之如衣、^七其睛因肥而暴露、其思想憧擾於其衷、^八每戲謔傳誇誣之事、而其言則矜誇、^九騰口於天、而其舌往來於地、^十是以主之民亦歸附之、而飲水以充滿之杯、^{十一}且云上帝焉能知、至上者有知

乎、^{十二}此違理之輩、安樂於斯世、增其貨財、^{十三}我遂謂我豈非徒潔己心、盥手於無罪中、^{十四}而比日受傷、每晨被責歟、^{十五}我苟云、我效彼言、我則獲罪於而子輩、^{十六}且我試思何術悟此、而於我目前實為難、^{十七}迨我入上帝之聖所、乃知伊等之究竟、^{十八}爾蓋置伊等於滑徑、而陷之於壑中、^{十九}伊等敗壞、以震懼滅而亡、何其倏然、^{二十}如已覺之夢、主令其覺後、消滅其幻想、^{二十一}我心沸而腸斷時、^{二十二}我為愚蠢而無知、如畜類於爾前、^{二十三}我常偕爾、爾持我之右手、^{二十四}爾以爾之訓導我、然後進我於榮耀、^{二十五}於天上為我者為誰、而在地我偕爾、別無所願、^{二十六}我肉心俱困、上帝乃我心之堅固、為我之分業至永世、^{二十七}蓋此遠爾者被亡、凡離爾者爾滅之、^{二十八}至我、以就上帝為善、我以我之冀望、付於上帝主宰、為於錫安女闈閣內、傳宣爾之諸事。

第七十三聖詠

^一上帝歟、何以永棄我儕、爾之怒、發猛烈於爾草壤之羊、^二求爾紀念爾自古所獲之會、爾所贖為爾之嗣業、即爾所占駐之錫安山、^三動爾趾、

至此世代敗壞之墟、仇敵於聖所中均拆毀、^四爾仇敵無佗（páo xiū/夕么' 丁一又/音刨敲，paau⁴ haau¹）於爾之諸會、換我儕之旗幟、而樹伊旗幟以為己記號、^五顯出如高舉斧斤、而欲砍樹之交枝者、^六且今彼以斧以鉞、盡毀其雕刻之工、^七以爾之聖所付於火、而污衊爾名之宅、^八其心謂、當盡壞其人、遂焚上帝之諸會於地上、^九今我儕不復見我儕之異兆、併無先知者、我儕中、無一知者、將至何時、^十上帝歟、仇之謗將至何時、豈敵將永毀爾名乎、^{十一}爾胡為掣爾手、即爾之右手、求爾自爾懷中、消滅伊等、^{十二}上帝我自古之君歟、施救拔於地中者、^{十三}爾以爾力曾擘海、曾斷折蛇首于水中、^{十四}爾曾擊碎鱷魚之首、而予耶斐鄂批阿曠野人為食、^{十五}爾曾擊出水及溪、而竭諸旺河、^{十六}晝屬爾、夜亦屬爾、爾曾施諸曜及日、^{十七}爾曾定普地之各界、而設冬夏、^{十八}祈爾計念之、仇敵謗主、而狂民毀爾名、^{十九}毋以爾斑鳩之靈投於野獸、永毋忘爾貧窮之會、^{二十}顧爾之約、因地之諸暗處充滿以強橫之宅、^{二十一}毋令受窘迫者承羞而回、乃願困苦及貧寡者、稱頌爾名、^{二十二}求上帝起

而護庇爾之事、記念狂人比日之譏謗爾、^二毋忘爾仇敵之喧聲、逆爾之譁擾、高盛不絕。

榮光讚詞

第七十四聖詠

^一上帝歟、我儕讚頌爾、復讚頌、蓋爾名不遠、以爾之諸奇跡所宣、^二我擇示而公義為審判、^三地及居民、均搖撼、而我將建其柱、^四我向妄狂者言、毋妄狂、向違理者言、毋舉爾角、^五毋高舉爾角、毋強項論上帝、^六蓋興盛非自東、非自西、亦非自曠野而來、^七乃上帝為審判升彼抑此、^八因爵係於主之手、雜攪之酒沸於內、而伊注之、地之眾惡者、並其麴（qū/ㄑㄩ/音曲，kuk¹）糟酢（zuò/ㄗㄨㄛˋ/音昨，zok⁶）而飲之、^九我則將永傳揚、而歌頌雅各之上帝、^十我將斷諸惡者之角、而義者之角、將被高舉。

第七十五聖詠

^一上帝於猶大地為其所識、于以色列其名實大、^二其曾處於撒冷、居於錫安、^三于彼、伊斷折

弓、矢、盾、劍及戰等、^五爾係光榮能力、逾於掠劫之山、^六心剛者、已被擄而酣眠之、其壯夫措手不及、^七雅各之上帝、因爾威嚇、車馬皆困倦、^八爾係可畏者、爾發怒時、孰能立爾面前、^九爾自天將示審判、^十上帝興起施審判時、為救於地受逼迫者、地即懼而安靜、^{十一}其人之怒將易、而讚稱爾、其怒之餘、爾將制之、^{十二}爾曹宜發願、而償之於爾主上帝、其四圍之人、當獻禮於可畏者、^{十三}伊制諸王之氣、於諸地之君、係可畏者。

第七十六聖詠

^一我聲向上帝、而我當呼籲之、我聲向上帝、而伊將聆之、^二我於憂愁之日尋主、宵間我舉手不下、我靈弗願受安慰、^三我記念上帝而戰悚、我思想之而我靈困之、^四爾弗令我合目、我顫動而弗能言、^五我思念昔日、及往世之年、^六我宵間憶念我之歌頌、我於心思想、我靈省察云、^七主永棄之乎、不復加以眷顧乎、^八其恩惠永止息乎、其言廢於世世乎、^九豈上帝忘施恩乎、以愠怒而閉仁慈乎、^十我即謂我憂患、乃至上者之右手變易、

^{十二}我將念主之事、憶爾古時之奇蹟、^{十三}我將審思爾之所為、而憶念爾之大事、^{十四}上帝歟、主之途係聖、何主能如我儕上帝之大、^{十五}爾係上帝、行奇蹟者、爾於萬民中、曾顯爾之全能、^{十六}爾以爾之肱、曾救爾民、乃雅各及約瑟之裔、^{十七}上帝歟、諸水曾見爾、見之而懼、淵亦震動、^{十八}雲曾注水、烏雲發雷、而爾之矢橫飛、^{十九}爾雷之聲響、在圓穹之內、電光曾耀普世、地則動且震、^{二十}爾之途在海、爾之徑在諸洪水、而爾之蹟不可測、^{二十一}爾曾以摩西亞倫之手、導爾民如羊羣。

榮光讚詞

第十一分 第七十七聖詠

^一我民聽我之道、側爾耳聆我口之言、^二我將啟口喻言、述古謎語、^三我等所聞所知、及我列父所傳于我等者、^四我等將弗隱於其子孫、乃以主之光榮、及伊權能、併其所行之奇蹟、皆傳宣於後世、^五已立誠約於雅各、置法律于以色列、

使我列父傳之于子孫、^六令來世即伊將生之子、
可以識此、而傳之於其子女、^七為使伊等、以冀
望付於上帝、弗忘上帝所為、而遵守伊之誡命、
^八不效其列父、抗違叛逆之輩、居心不正、弗以其
靈忠於上帝者、^九耶福咧木之裔、服執甲械而拽弓
者、於戰日乃退、^十弗遵守上帝之誡約、弗肯行
于伊之法律、^{十一}忘伊索為、及所示伊等之奇蹟、
^{十二}伊曾行奇蹟于伊等列父目前、于埃及地左罕
之野、^{十三}擘分海水、引之行過、使水立如壁然、
^{十四}晝則以雲導之、徹夜則以火光導之、^{十五}劈石
於野、飲之如於大淵然、^{十六}出流水自磐石、而水
湧如河、^{十七}然伊等仍行罪于伊前、愠至上者於曠
野、^{十八}心中曾嘗試上帝、為求食以遂己之貪性、
^{十九}謗上帝云、豈上帝能肆筵於曠野乎、^{二十}伊既
掣石而水流泉湧、今猶能以餌供乎、能為斯民備
肉乎、^{二十一}主聞之赫怒、有火焚於雅各、動怒于以
色列、^{二十二}因伊等不信上帝、弗倚望伊之救拔、
^{二十三}伊乃命上雲啟閭闔、^{二十四}而瞞納為伊等之食、
以天糧供伊等、^{二十五}人即食天神之食、供伊等糧以
至飽足、^{二十六}伊起東風於天、以己能力引南風至、

二七而以肉降于伊等如塵、降飛鳥如海沙然、
二八墜之于伊等之營中、近伊等之居處、二九伊等
遂食饜足、是伊以伊等所願者予之、三〇伊等之貪
未畢、其食尚在其口、三一而上帝之怒即至、戮其
胖健者、敗壞以色列之年少者、三二雖然而伊等仍
犯罪、弗服伊之奇蹟、三三是以伊令伊等終其日
於空虛、卒其歲、其歲於驚惶、三四伊戮伊等時、
伊等尋伊而回歸、且早起覓上帝、三五記憶上
帝、乃伊等之歸處、至上上帝、乃伊等之救主、
三六第伊等以其口謠語、以其舌妄言于伊前、
三七然伊等之心、未曾正直于伊前、而不誠于伊之
誠約、三八惟伊慈憐者、曾赦其罪、而不滅之、
屢回其怒、而不發動其忿懣、三九伊紀念伊等乃肉
軀、如氣去而不返、四十伊等蓋幾次惱主在曠野、
犯伊在荒地、四一伊等復試上帝、干犯以色列之
聖者、四二伊等不紀念伊手、即救伊等脫離於窘迫
之日、四三即施諸奇妙在埃及時、施諸奇蹟在左
罕野時、四四以彼江河化為血、使伊等弗能飲、
四五放飛蟲而嘍之、令蟾蜍害之、四六以伊等地所
產者、付於螟蟲（máo/ㄇㄠˊ/音茅，maau⁴）、

以伊等所勞力者、付於蝗、^{四七}以雹擊壞其葡萄樹、以冰壞其無花果樹、^{四八}以伊等之畜付於雹、以伊等之牧羣、付於電、^{四九}以發怒之火、降于伊等、及忿惱併難、且遣惡神、^{五十}修平為施已怒之途、不保其靈於死、而付伊等牲畜於瘟疫、^{五一}擊埃及首生者、即于含幕中產生之基、^{五二}乃率其民如羊在野、導之如牧羣、^{五三}導之以平安、而伊等無懼、其仇敵以海水覆之、^{五四}導之至己之聖域、至此山、乃伊右手所獲者、^{五五}遂逐列邦於其民面前、分其地為伊等之嗣業、按以色列各支派、居其幕中、^{五六}然伊等猶試至上之上帝、而憂惱之、及弗遵守其法律、^{五七}離而背逆、如其祖父、退卻如弓弛、^{五八}以崇高干其怒、以偶像致其疾憾、^{五九}上帝聞之乃赫怒、大憾以色列、^{六十}棄錫羅木之宅、即駐於人間之幕、^{六一}以其力及光榮、付於仇敵手中、^{六二}又以其民、付於劍刃、發怒於其嗣業、^{六三}其幼壯者、以火被焚、其女弗能唱婚姻之歌、^{六四}其司祭被仆於劍、其嫠婦乃不能哀哭、^{六五}然主乃如眠者之已覺、如豪傑被酒而復醒、^{六六}擊仇敵於背後、而永辱之、

六七及棄約瑟之幕、併不選耶福咧木之支派、六八乃擇猶大支派、伊所愛之錫安山、六九乃建其聖所如天、永定其基如地、七一選其僕大衛、攜之自羊棧道、七一自擠者中、引之使牧其民雅各、其嗣業以色列、伊乃牧伊等以淨心、導以賢手。

榮光讚詞

第七十八聖詠

一上帝歟、異邦人已入爾之嗣業、已污爾之聖堂、而以耶路撒冷毀為墟、二以爾僕之屍、予飛禽為食、以爾聖人之肉、予地之野獸、三流其血如水、於耶路撒冷四周併無人葬之、四我等為鄰所恥笑、被環我者所侮謗、五主歟、爾常怒我儕、爾憾如火之烈、將至何時、六求傾爾怒於不識爾之列邦、及不籲爾名之列國、七蓋伊等已噬雅各、而盡壞其居處、八於我儕、毋憶我前輩之愆尤、速令爾之慈憐迓（yà/一丫、/音訝，nga⁶）我儕、蓋我已窮困至極、九上帝救我者、藉爾名之光榮而輔助我等、因爾名救我、而赦我之罪、十何為許列邦人、謂伊之上帝安在、願報主僕之血仇、列邦人識之

於我儕目前、^{十一}願被囚者之慨歎、至爾面前、以爾臂之力、救護將死者、^{十二}主歟、以我鄰毀爾之謗、七倍報之於其懷、^{十三}至我儕係爾之民、乃爾草地之羊、將永讚頌主、且傳宣爾之讚美於世也。

第七十九聖詠

^一以色列之牧者、側耳聽、導約瑟之子如羊、坐於赫儒文者、懇現出、^二動爾之力、於耶福咧木、汶阿明及瑪納錫阿之前、而來救我儕、^三上帝歟、起我儕使爾面光照之、而我儕得救、^四萬天軍之主、上帝歟、爾怒於爾民之禱、將至何時、^五爾食伊等以淚之餐、飲之以多淚、^六爾以我儕為鄰之爭、而我儕仇敵以我為戲笑、^七萬軍之上帝、起我儕、使爾面光照之、而我儕得救、^八爾移葡萄樹一枝、自埃及、逐列邦而植之、^九爾為之耘地、植其根而滋蔓於地、^十諸山蒙其蔭、其枝如上帝之栢樹、^{十一}達其枝至海、展其萌蘖至河、^{十二}爾胡為毀其藩籬、至諸行路者摘之、^{十三}林豕（sh ĭ / 彳 ~ / 音此，ci2）扒之、而田獸飼之、^{十四}萬軍之上帝、轉爾面、

自天觀鑒之而臨此葡萄、^{十六}護爾右手所植、及萌蘖為己所定者、^{十七}其為火所焚、而被消、因爾面之嚇、將滅亡、^{十八}願爾手覆於爾右手之人之上、即爾為己所建定之人子之上、^{十九}則我儕將弗離於爾、甦我儕而我儕將呼籲爾名、^{二十}主萬軍之上帝、起我儕、使我面光照之、而我儕得救。

第八十聖詠

^一爾儕當歡歌於我儕力量之上帝、呼籲於雅各之上帝、^二歌詠擊鼓、撫和琴與瑟、^三吹角于新月、即我曹良晨之時、所定之佳節日、^四蓋此乃以色列之規矩、雅各上帝之則例、^五此乃約瑟于出埃及即聞所未明之言之地、伊乃定此為之證雲、^六我已卸其肩之重荷、而其手得免於筐筭、^七爾於苦難時已求我、而我曾救爾、我自雷中已聆爾、而試爾於蔑利瓦之水、^八我民聽我、我將為証、以色列歟、苟爾聽我、^九必不可于爾曹別有上帝、爾毋拜異邦之主、^十我乃爾之主、^{十一}然我民弗聽我之聲、以色列未曾服我、^{十二}是以我縱之、任其心之抗悞、依其謀而行、^{十三}我民苟聽我、以色

列苟行我之途、^{十五}我即迅速抑其仇敵、轉我手於其窘者、^{十六}則疾主者、必服事之、而伊等之福、必至永遠、^{十七}我則必以嘉麥育之、以石中之密、饜足伊等。

榮光讚詞

第八十一聖詠

^一上帝立於諸主之會、於其中判斷、^二謂爾曹審斷不公、反徇庇惡者、將至何時、^三爾曹宜於窮困及孤子伸理、而為窘迫及貧寡者、施公義、^四拯救貧寡者、而提拔之於惡者之手、^五此輩無知、亦無明悟、行於暗中、而地之基、皆震動矣、^六我言爾曹為權主、爾曹均係至上者之子、^七第爾曹必死如諸人、將顛僕如各君、^八上帝歟、起而審判地、因爾將繼嗣萬民。

第八十二聖詠

^一上帝歟、毋默、毋無言、上帝歟、毋寂靜、^二因爾之仇敵僥擾、疾爾者昂首、^三出奸謀於爾之民、計議於爾所護庇者、^四伊等曾言、我儕往滅之

於諸邦中、使以色列名弗記憶、^六伊等曾同心相議、結約背爾、^七即耶鐸木之屯聚、及伊斯瑪伊泐併摩阿烏及阿咖兒、^八又碣瓦泐及阿孟、及阿瑪利克、及斐利斯提木、與提爾之人、^九亞述亦附和之、盡皆為羅特子孫之輔助、^十願主行於此眾、如昔行于瑪底阿木及錫薩喇及亞微訥、於乞斯溪之濱、^{十一}皆被滅于阿音鐸兒、而為地糞、^{十二}求爾播弄其諸王、如鄂喇烏、濟烏、而播弄其統帥、如捷韋、及薩泐瞞等、^{十三}因其謂我儕、可踞上帝之居址、^{十四}我上帝歟、願共塵於迴風、如枯草之於風、^{十五}如火焚林、如燄烈山、^{十六}爾亦以爾之暴風逐之、以爾之迴風亂之、^{十七}主歟、以羞辱蒙其面、使其尋求爾名、^{十八}願其永遠被羞而擾亂、被辱而滅、^{十九}使其知爾乃獨一稱主者、係普地之至上者。

第八十三聖詠

^一萬軍之主、爾所居處、何其可愛、^二我靈急思進主院、我心身馳於生活之上帝、^三萬軍之主、我君我之上帝、雀已獲巢、燕已獲窩、併置其雛於爾之壇、^四其居爾室者、誠有福、伊等將常讚頌

爾、^六人恃力於爾、及心往向爾者、誠有福、^七伊等行過淚谷時、獲水泉、而甘雨覆之、以降福、^八其力常增進、乃朝覲上帝於錫安山、^九主歟、萬軍之上帝、聽我之禱、雅各之上帝聆我、^十護衛我儕之上帝、俯視爾所傳油者之面、^{十一}因一日在爾院、勝於千日、我寧願止於上帝室中之檻、弗願處惡者之幕、^{十二}蓋主上帝係日即及盾、主施恩寵及榮光、其行於無罪者、不褻（chǐ/ 彳 ˘ /音此，ci²）其善之分、^{十三}萬軍之主、賴爾者誠有福。

第八十四聖詠

^一主歟、爾已轉慈憐於爾之區、歸被擄之雅各、^二饒恕民之諸愆尤、蓋其諸罪、^三去爾之赫怒、除爾怒之猛烈、^四求救我儕之上帝、復立我儕、絕爾向我儕之怒、^五豈永疾怒我儕、豈將含怒、伸至世世、^六豈不復甦我儕、不使爾民因爾而歡欣、^七主歟、顯爾恩慈於我儕、而賜於我儕、而賜救於我儕、^八我將聽上帝主宰所示諭、伊將調平安於其民、及於其所選者、祇毋復其狂行、^九如此、則主之救贖、邇於敬畏之者、至光榮得處於我之區、^十恩慈與真理

當相遇、公義與和平當相懷抱、^{十二}真理當出自地、
公義當降自天、^{十三}主將降福、而我地將產其果、
^{十四}公義將行於主之前、而置足於其途。

榮光讚詞

第十二分 第八十五聖詠

^一主歟、傾耳而聽我、因我係窮苦及貧寡、
^二護我靈、因我誠敬於爾、我上帝歟、就冀望爾之
僕、^三主歟、矜憐我、因我比日呼籲爾、^四主歟、
悅爾僕之靈、因我舉我心向爾、^五因主乃慈善及寬
裕、加鴻慈於凡呼籲爾者、^六求主聽我、祝聆我
禱之音、^七於憂患日、我呼籲於爾、因爾曾聆我、
^八主歟、諸君宰中、無如爾者、無如爾所行者、
^九主所造之萬民、當趨而伏拜於爾前、及讚榮爾
名、^十因爾乃極大而行奇蹟、上帝歟、係獨一者、
^{十一}主歟、導我於爾之途、而我將行於爾之真理、
定我心於敬畏爾名、^{十二}主我之上帝、我將盡心讚
頌爾、而永讚揚爾名、^{十三}因大爾恩於我、爾

曾提拔我靈、於極深之地獄、^{十四}上帝歟、驕傲者起向我、強暴之黨尋我靈、而弗置爾於其目前、^{十五}然爾乃宏慈憐善、寬忍洪恩、及真實之上帝、^{十六}求俯顧我、而矜憐我、賜爾力於爾僕、而救爾婢之子、^{十七}賜我蒙恩之證、使疾我者、見之而被羞、因主已助我、而安慰之。

第八十六聖詠

^二伊之基址在聖山、主愛錫安之闔闔、逾於雅各之諸居址、^三上帝之城歟、以爾光榮之事所傳、^四我必論於識我者、以喇阿烏、及巴比倫、以斐利斯提木人、及提爾、耶斐鄂批阿、必言彼皆產於此、^五以錫安必言、謂此人彼人生於茲、至上者、將親建立之、^六主將於眾民之冊、記斯人生於此、^七歌樂者歟、我之泉源皆在斯。

第八十七聖詠

^二主救我之上帝、我晝呼籲爾、夜亦於爾前、^三願我之禱、至爾面前、傾爾耳於我之禱、^四因我靈飽於苦難、而我生命逼近於地獄、^五我已如入墓者、

成如無力之人、^六被投於羣死之中如被殺偃臥柩內、爾所不復念、而由主手被棄絕者、^七爾曾置我於深下之坎內、黑暗及無底之壑、^八爾之奮怒、重壓於我、而以爾之諸波擊之、^九判離所識者於我、使我為伊等所惡、我被錮閉而弗得出、^十因憂苦我目疲極、我終日呼籲爾、向爾舉手、^{十一}爾于死者豈能施奇蹟乎、亡者豈能起而讚揚爾乎、^{十二}於墓中豈能宣揚爾之恩乎、抑爾之真實、豈於朽敗之地乎、^{十三}於暗中孰識爾之奇蹟、於忘地孰知爾之公義、^{十四}主歟、乃我呼於爾、清晨我之禱至爾前、^{十五}主歟、爾何為棄我靈、何為蔽面於我、^{十六}我係無福者、自幼時漸被消化、我負爾之驚嚇、而疲憊、^{十七}爾之赫怒已逾我、爾之驚嚇已損壞我、^{十八}乃每日環我如水、齊集團我、爾判離我友及親近者於我、而我所識者弗見。

榮光讚詞

第八十八聖詠

^一主歟、我以爾恩永歌頌、我口欲傳爾之真理、至世世、^二蓋我言、恩惠永遠建立、爾定其真理於天、^四謂夫我曾與我所選者立約、與我

僕大衛設誓、^五我永定爾之裔、且建爾之寶位於
世世、^六上帝歟、諸天將光榮爾之奇蹟、及爾之
真理、於聖者之會、^七蓋於諸天中、孰堪擬主、
于上帝子中、孰堪與主較、^八上帝於聖者之大會、
為可敬畏者、環主之人、為可敬畏者、^九上帝萬
天軍之主、誰之能力如爾、爾之真理環繞爾、
^十爾治海之奮怒、其波飛騰、爾平息之、^{十一}爾令
阿喇阿烏傾仆如被殺者然、且用有能之手、潰其
仇敵、^{十二}諸天屬爾、地屬爾、世界及載滿於其
中者、爾曾建之、^{十三}爾造南北、他泊及耶兒孟、
因爾名必欣忭、^{十四}爾之肱有能、爾之手有力、
爾右手乃極高者、^{十五}公平與義理、乃爾寶座之
基、恩惠與真理、將行於爾面前、^{十六}識鳴角而
集之民有福、上帝歟、伊等將行於爾面之光、
^{十七}伊等因爾名、終日歡娛、因爾之義、被升舉、
^{十八}蓋其力以爾而榮耀、且將施恩、揚舉我儕之角、
^{十九}我儕之盾屬主、我儕之君、屬以色列之聖者、
^{二十}昔爾以默示、與爾聖者相談、謂夫、我以勇者、
曾施輔助、自民中所選者、我曾升舉之、
^{二十一}我已獲我僕大衛、曾以我聖膏傳之、^{二十二}我手

永偕之、我肱必將固之、^{二三}仇敵定弗勝之、惡者之子弗欺凌之、^{二四}於其面前、我將毀其仇敵、擊彼疾之者、^{二五}我真理及恩惠將偕之、其角將以我名得升舉、^{二六}我將置其手於海、置其右手於諸河、^{二七}伊將呼我、謂爾乃我之父、我上帝、救我之倚護、^{二八}我特立之為我之適子、逾於地上之列王、^{二九}我必為伊永存之恩惠、必為伊立定我之約係真者、^{三十}我將永存其裔、其位定常存、如天之曆日、^{三一}其子若棄我之法律、弗行我之誠命、^{三二}儻遠我之律則、弗遵守我之命令、^{三三}我即以杖擊其惡、鞭撻其違義、^{三四}但我恩弗離之、不廢我之真理、^{三五}我定弗違我之約、出我唇者、我弗改之、^{三六}我一次曾以己之聖設誓、我豈欺大衛乎、^{三七}其後嗣必永存、其位恒如日於我面前、^{三八}必永固如月、必如於穹蒼之證據、^{三九}第爾現棄、且藐而疾怒爾之被傳油者、^{四十}廢其僕之約、擲其冠冕於地、^{四一}毀伊垣堞、並其闕隘頹壞、^{四二}行路者皆攘奪之、伊且為其鄰所譏諂、^{四三}爾舉其仇之右手、令其仇歡欣、^{四四}爾且轉其刃、令其於戰時弗健立、^{四五}褫其光照、倒置其寶位於地、

四六曾滅滅其少壯之日、令以羞覆之、四七主歟、
自隱將何如之久、爾之怒如火烈、殆至何時、
四八願念我生時極短、爾造諸人子、何以使其虛
幻、四九人間誰生而弗死、孰能脫其靈於地獄之
手、五十主歟、爾昔時之恩何在、爾依真理、誓於
大衛、五一主歟、願念其僕之受謗、以眾民置於
我懷、爾仇敵之謗、即辱爾被傳油者之跡、
五二願主受讚揚於世世、阿民阿民。

榮光讚詞

第八十九聖詠

二主歟、爾乃我儕世世之投避、三未見山生
出、爾未造地及普世之先、爾由創世、直至世
末為上帝、四爾令人歸朽腐、乃謂人之子、爾曹
宜返、五蓋爾目前、千載如已逝之昨日、且如夜之
更、六爾以之如大水逝矣、七蓋我儕、因爾之怒而
消亡、因爾之忿懣（zhi/蚩` /音志，zi³）而驚惶、
八爾以我儕之惡、列於爾前、以我之隱、陳於爾面
光之前、九我之諸日、因爾之怒而消逝、我儕之
歲、其去如舌音、十我儕歷年有七旬、或健至八

秩、其間安善時、亦多劬（qú/ㄑㄨˊ /音渠，qu⁴）
勞病苦、其逝之迅速如飛、^{十一}誰知爾怒之力、
誰依敬畏爾、而識其怒、^{十二}祈指示我、揆（kuí/
ㄎㄨㄟˊ /音葵，kwai⁴）我儕之日、為我儕能獲
慧悟心、^{十三}祈主轉面、將至何時、憐念爾之僕、
^{十四}早以爾恩寵、饜飫我儕、而我儕將一生歡樂、
^{十五}求令我儕喜悅、如爾所罰我儕之日期、及邁
（gòu/ㄍㄡˋ /音夠，gau³）難之諸年、^{十六}願爾之
工、顯現於爾僕、及爾榮著于伊等之子、^{十七}願我
主上帝之恩、覆被我儕、願佑助我儕之手工。

第九十聖詠

^一凡居至高之覆中、必獲息於全能之蔭、
^二向主曰、我之投避、及我之護佑、我所冀望之
上帝、^三彼必救之於畋獵之網、及瘟疫、^四以己
之羽、覆爾於其翼下、必無礙、其真理、如盾如
垣、^五爾必不懼昏夜之震驚、及晝之飛矢、^六及黑
暗所行之瘟疫、及午間所傷之瘴疫、^七千人仆於
爾側、萬人仆於爾右、且不近爾、^八但爾目親視
之、見其受惡之罰報、^九蓋爾謂主、乃我之倚望、

第十三分

爾擇至上者為投避、^十惡弗能邁於爾前、疫弗能侵爾居、^{十一}蓋命天神護爾、守爾於所行之諸途、^{十二}其必以手扶持爾、弗令爾足蹶於石、^{十三}踐蝮蹈蛇、踏獅及龍、^{十四}因其愛我、而我救之、我覆之、因其識我之名、^{十五}呼籲我、我必聽之、於憂患時、我偕之、拯之、榮之、^{十六}以恒久度生饜足之、及獲見我之救。

榮光讚詞

第十三分 第九十一聖詠

^三至上者歟、讚榮主、歌頌爾名、^三於旦傳揚爾之恩、爾之真實、於夜亦然、^四以十絃之樂器、以和琴與瑟及歌頌乃為善、^五主歟、以其工作、令我喜悅、因爾手之所作、我將歡樂、^六主歟、爾之造作、何其大、爾之思何奇巧之深、^七愚昧人弗知之、拙蠢者弗明知、^八惡者之生出如草然、行惡者之發花、為永滅、^九其時主係至高、直至永遠、^十主歟、因爾之仇敵滅亡、行惡者被流離、

^{十一}第爾舉我角如犀角、我以新膏被傳、^{十二}我目得見我仇敵、我耳聞攻我之惡人向我起、^{十三}義者發華如櫟、高出如黎巴嫩之松柏、^{十四}伊等植於主之室、於我上帝之院發華、^{十五}伊等及老結實、必潤澤且新鮮、^{十六}位表揚主係公義、乃我之堅固、且無不義者。

第九十二聖詠

^一主為君、乃以威嚴衣之、主以能力服之、束繫之、故世界乃堅固、必不搖撼、^二爾之座自古堅立、爾係於諸世前、^三主歟、諸河騰、諸河騰其聲、諸河騰其波濤、^四主居於上、有能力、越於洪水之聲、越於海之大波、^五爾之默示、確係真實、主歟、聖德屬爾之堂、直至永遠。

第九十三聖詠

^一主歟、報復之上帝、報復之上帝、肯顯出、^二地之審理者興起、報彼驕傲者、^三主歟、惡者將何如之久、惡者獲勝將何如之久、^四伊等談輕藐之言、凡行惡者自矜誇、^五伊等踐踏爾民、凌侮

爾產、^六戮嫠婦及旅客、誅孤子、^七彼謂主必弗察、雅各之上帝弗知、^八諸昏憤之人、宜覺悟、愚蠢者何時乃悟、^九傳耳者、豈未聞之、造目者豈未見之、^十誨列邦者、開啟人者、豈弗約束之、^{十一}主知人之念慮乃空虛者、^{十二}主歟爾所誨者、以爾道所教者、^{十三}為其於艱難之日、直至為惡者所拙之阱得平安、其人乃有福、^{十四}蓋主必不棄爾之民、必不遺漏爾之嗣業、^{十五}蓋審判定歸於公義、心正者必隨之、^{十六}誰為我起、而攻行惡者、誰為我起、而攻作慝（tè/忒ㄊㄛˋ /音剔，tik¹）者、^{十七}儻主不輔助、則我靈必幾欲處於默地、^{十八}我謂我失足、其時主以恩扶持我、^{十九}我心多有憂思、爾之安慰令我靈甘、^{二十}壞人背道、謀殘害者之座、豈肯與主相近、^{二十一}伊等羣聚、攻義者之靈、治罪於無辜之血、^{二十二}第主為我之保障、我上帝為我投避處之堅固、^{二十三}其必以此眾之惡償之、以其惡滅之、上帝我主必滅之。

榮光讚詞

第九十四聖詠

一請眾來於主前、歌頌呼籲於上帝、係救我
儕之堅固、二宜以讚揚近至主前、以歌頌呼籲之、
三蓋主乃大、上帝係諸主之大君、四地之深、皆在
其掌、山之極高、亦屬之、五海亦屬之、係伊所
造、其手亦造稿（gǎo/ㄍㄠˇ/音稿，gou²）壤、
六請眾來、叩拜俯伏屈跪於造我之主面前、七蓋伊
係我儕之上帝、且我儕為其草棧之民、及其手之
羊、若爾曹今日肯聽其聲、八毋剛復爾曹之心、
如於蔑利瓦如於曠野試探之日、九於彼、爾曹之
列祖、試我、嘗我、見我之所行、十四十載以此
世代憤怒、並謂此民乃心昧者、素不識我之途、
十一我已設誓於我發怒時、弗容伊等入我安息所。

第九十五聖詠

一爾曹宜以新謠歌頌主、普地且歌頌主、
二爾曹宜歌頌主、讚祝爾之名、累日傳宣其救、
三宜宣示其榮光於列邦、及奇蹟於萬族中、四蓋主
為大且被讚揚者、並踰於諸主之可畏、五蓋列邦之

諸主、乃偶像、惟主創諸天、^六有光榮及威嚴於其面前、有能力及美好於其聖所、^七此民之眾族應報謝主、以光榮及尊貴報謝主、^八以其名之光榮報謝主、攜禮物往主院、^九宜拜主於其聖之美好、普地於其面前宜戰慄、^十爾曹向諸列邦言、主為君、以此普世乃堅固、弗能搖撼、伊將以公義欲審判眾民、^{十一}諸天宜喜悅、地宜慶忭、海中所盈滿者、宜發聲、^{十二}田畝及其中所有者、皆宜欣喜、林之諸木、宜歡樂、^{十三}於上帝前、蓋伊來、伊來審判地、其將以公義審判天下、以真實審判萬民。

第九十六聖詠

^一主為君普地宜歡樂、眾多島均宜喜悅、^二雲及黑暗環擁之、公義審判、係其寶座之基址、^三於其面前行火、焚其四周之仇敵、^四其電光照世界、地見之而戰慄、^五諸山如燭銷化於主前、即普地之主前、^六諸天傳揚其公義、萬民見其光榮、^七凡事雕刻之像者、以偶像自矜誇者、必皆承羞、諸天神宜拜於其前、^八主歟錫安聞而悅、猶大諸

女歡樂、因爾之審判、^九蓋主於普地、崇高踰於諸主、係被讚揚者、^十愛上帝者、爾曹當惡奸惡、伊存聖者之靈、脫之於惡者之手、^{十一}有光輝照義人、有歡樂加至心正者、^{十二}義者宜為主喜悅、且讚美其聖名。

榮光讚詞

第九十七聖詠

^一爾曹宜以新歌謠歌頌主、蓋伊已行奇蹟、其右手及其聖肱已獲勝、^二主顯其救於萬民目前、啟示己之公義、^三伊念雅各之恩惠、及以色列家之誠實、凡地角、已見我儕上帝所施之救、^四普地宜呼籲於主前、慶賀喜樂歌頌、^五以琴歌頌於主、以琴及聖詠之聲、^六以筊與角之聲、慶賀於主君之面前、^七海及盈滿於其中者、宜發聲、世界及凡居於其內者亦如斯、^八川河宜鼓掌、山嶽宜慶忭、^九於上帝前、蓋伊來審判地、其將以公義審判天下、以真實審判萬民。

第九十八聖詠

一主為君、萬民戰兢、其坐於諸赫儒文上、地乃震動、二主於錫安為極大、崇高逾於眾民、三宜讚揚其至大及可畏之名、因其乃聖者、四君力喜公義、爾已堅定正理、乃於雅各中、已行審判及公義、五宜讚揚主、我儕之上帝、且叩拜於其足下、因其乃聖者、六司祭內、有摩西及亞倫、祈禱其名者中、有撒慕爾、呼籲於上帝、主即允之、七伊自雲柱諭之、伊等遵守其誠命、及其所賜之法律、八主我儕之上帝、爾曾允之、爾為伊等寬恕、且償報其所行之上帝、九宜讚揚主我儕之上帝、且拜於其聖山、蓋主我儕之上帝乃聖者。

第九十九聖詠

一普地呼籲於上帝前、二爾曹當以歡樂事主、以呼籲趨至其前、三宜知主乃上帝、伊造我儕、且我儕屬之、我儕係其民、係其草棧之羊、四爾曹宜以讚頌入其門、以讚美進其院、榮光之、讚揚其名、五蓋主乃慈善者、其恩惠乃永存、其真理直至世世。

第一百聖詠

一主歟、我將歌頌仁慈公義、我欲歌頌於爾前、二我將思慮無辜之路、爾將至我於何時、我以無辜心行於我家、三我目前不置邪僻之物、及疾犯法之事、四彼弗能沾染、敗壞心、被我所離惡者、我弗識之、五於暗中誣謗親近人者、我將逐之、睨視心傲者、我不容之、六我目視此世代之忠者、令偕我居、行無辜之路者必事奉我、七行狡詐者弗居於我家、妄言者不在我目前、八清晨、我擊滅此世之諸惡者、令凡行惡者見除於上帝域。

榮光讚詞

第十四分

第一百一聖詠

一主歟、聆我之禱、我呼籲達至爾前、二毋蔽爾面於我、我憂愁日、傾耳聽我、我呼籲爾時、迅速聆我、三蓋我日消滅如煙、我骸似火焚而焦、四我心被斬截、及枯槁如草、至我忘食我之餐、

六因我呻吟聲、我骸貼於膚、七我如野地之鴉鵂、
如荒舍之鳴鴉（xiāo/ㄒ一ㄠ/音梟，hiu¹）、八我弗
眠而坐、如止於屋脊之孤島、九我仇每日譏謗我、
憤我者向我而詈、十我食灰如餌、我和淚而飲、
十一因主赫怒及忿憤、蓋爾曹曾升舉我、復遺置
我、十二我日如晷已斜、我枯如草、十三主歟、
爾乃永在、為爾之記憶在世世、十四爾必興起、
矜恤錫安因慈憐之期至矣、誠已至矣、十五爾之
諸僕、愛彼中之石、及惜其塵、十六萬民將敬畏
主名、及普世之諸王、將欽爾之光榮、十七因主欲
建錫安、及以其光榮表顯之、十八伊復聆窮乏者
之禱、不輕視其禱、十九此必為將來之世代而蒙
紀錄、後裔必讚揚主、二十因其自聖之高區俯首、
主自天監觀地上、二十一為聞被掠者之呻吟、欲解受
死之子、二十二使其在錫安傳揚主名、且於耶路撒
冷而讚頌之、二十三即係在諸民及列國、集聚事奉
主之時、二十四其曾於途中、弱我之力、減我之日、
二十五我曾謂我上帝、毋於我日之半途時逝我、爾之
年直至世世、二十六主歟、自古創地、諸天亦爾手所
造者、二十七彼定消化、惟爾常存、彼必皆朽敗如

衣、爾將易之、彼必為改變、^{二八}惟爾不易、爾之年無窮盡、^{二九}爾諸僕之子必生存、其後裔必堅立於爾面前。

第一百二聖詠

^一我靈當讚稱主、我臟腑亦讚稱伊之聖名、
^二我靈當讚稱主、而毋忘伊之諸恩、^三伊赦爾之諸罪惡愆、療爾之諸疾、^四救爾之生命於墓、以恩寵矜憐冠之、^五以美好充爾所願、爾復成幼稚如鷗鷹然、^六主行公義及審判、于諸被屈者、^七伊曾示已途於摩西、示已事蹟于以色列之子、^八主乃善施及仁厚、寬忍及鴻慈者、^九怒弗終恚（hui/ㄏㄨㄟˋ /音 胃，wai⁶）亦弗永、^十弗據我之罪惡而行於我儕、弗依我之罪過而報於我儕、^{十一}蓋主之恩寵向敬畏伊者、其大若高天於地、^{十二}伊離罪於我儕、其遙如自東徂西、^{十三}憐憫敬畏伊者、其誠如父於厥子、^{十四}因伊知我儕之形體、憶念我儕塵土、^{十五}人之日如草、其華如野花、^{十六}經風即消、以至不復識其處、^{十七}而主恩於敬畏伊者、

於世世、^{十八}其公義、臨至守其約之子子孫孫、及懷念其誠而行之者、^{十九}主建其寶座於天、其國、統轄萬有、^{二十}主之諸天神具大能力、遵其諭、而聆其言者、俱宜讚稱主、^{二十一}主之諸軍使役、而行其旨者、宜讚稱主、^{二十二}主所造者宜讚稱主、于伊所轄制之諸地、我靈宜讚稱主。

榮光讚詞

第一百三聖詠

^一我靈當讚揚主、主我之上帝、爾乃奇妙之威嚴、爾被光榮及威嚴、^二爾以光服如袍、舒天如幔、^三爾於諸水上建霄殿、爾乘雲如車、行於風之翼上、^四爾以神為差役、以火燄為己僕、^五爾建地於堅固之基址、世世弗動、^六爾以淵如服而覆之、山巔水立、^七以爾之威命彼水即逝、以爾之雷聲即迅逝、^八水升於山、降於澗、至爾為其所定之地、^九爾定其經界、其必不溢出、折反漫地、^十爾驅泉水於澗、山間水流、^{十一}為飲諸野獸、野驢消其渴、^{十二}其旁棲空中之鳥、由枝間聞其聲、^{十三}爾從已之上宮、灌盈諸山、爾所造之果地得饜

足、^{十四}爾令草長、以飼牲、令蔬生供人用、為令地生食、^{十五}及悅人心之酒、澤人面之膏、及養人心之五穀、^{十六}主所植之樹、黎巴嫩之松柏、得饜足、^{十七}其上鳥結巢、松為鶴之棲處、^{十八}崇山為黃羊之宅、磐石為兔之投歸、^{十九}主造月定時日、日知沉西、^{二十}爾布昏暗即有夜、彼時諸林之獸始遊行、^{二十一}獅吼為攫物、乞食於上帝、^{二十二}日出獸鹹集、隱伏於其穴、^{二十三}人出工作、劬勞至暮、^{二十四}主歟、爾所行何其多、爾純以智慧而造、地盈主之所造者、^{二十五}此乃極大且廣之海、其間有無算伏動大小之生物、^{二十六}其間亦有舟行、其間有爾所造浮游其中之鯨、^{二十七}伊等皆候主、隨時予食、^{二十八}爾予之、伊等即受、主張手伊等以善獲饜、^{二十九}蔽爾面伊等則懼、奪其氣伊等則死、而往歸其土、^{三十}爾施其氣伊等即蒙造成、且見新於地之面、^{三十一}願主光榮永在、願主悅彼所造者、^{三十二}主視地地則震動、拊山則發煙、^{三十三}我欲一生讚頌主、我至終必讚美我之上帝、^{三十四}我願歌頌悅主、為主我則喜、^{三十五}願凡獲罪者、滅於地、違理者消亡、我靈當讚揚主。

榮光讚詞

第一百四聖詠

一爾曹讚榮主、呼籲爾名、於異邦宣揚爾所行者、二宜為爾歌頌、為爾頌詩傳揚爾之諸奇事、三當因其聖名而矜詡、凡尋主者心宜樂、四宜尋主及其力、恒尋其面、五爾曹宜記憶主所行之奇蹟異事、及其口之判斷、六爾曹亞伯拉罕之裔、乃主之僕、雅各之子、乃主所選者、七其乃主我儕之上帝、爾之諸判斷乃徧於普地、八主恒記憶其誠約、及所命於千代、九即予亞伯拉罕所定之言、及于以撒所設之誓、十主亦堅定之、予雅各為法、予以色列為永約、十一且謂、我將賜迦南地於爾、為爾應分之產、十二彼時、爾並無多、爾並無多、且為旅子於彼地、十三伊自此邦至彼邦、由是國至異民、十四主弗容人侮之、且因之禁列王、十五謂夫、毋侵我之被傳油者、毋害我之先知云、十六主復召饑荒降於地、並其莖毀之、十七復令一人先眾往、約瑟被賣為僕、十八人以鐺鐐梏其足、其靈入於鐵、十九俟其言驗、上帝言煉試之、二十王遣人釋之、列名之宰官、令人釋之、二十一立之為其家豕宰、治其所有、二十二令之

隨意檢束王之臣、且以明智誨王之老成、^{二二}其時以以色列入埃及、雅各徙于含地、^{二三}上帝使其民極加多、令其勝於仇敵之力、^{二四}主令仇敵心疾彼民、以狡詐待主僕、^{二五}伊遣其僕摩西、及所選之亞倫、^{二六}斯二人于伊等中、指示主奇蹟之言、於含地、指示主之異跡、^{二七}主施昏暗而晦之、眾不違主之命、^{二八}又令其水化為血、亡其魚、^{二九}其蕃育多蛙、其列王之室亦有之、^{三〇}主發命則蠅虻來至其四境、^{三一}復降雹代雨、施烈火於其地、^{三二}又擊彼葡萄及無花果樹、折其四境之樹、^{三三}主發命則來算之蝗、與青蟲、^{三四}蝕盡其地之各蔬、蝕其田之諸果、^{三五}主擊彼地址凡首胎生者、即強壯時所首生者、^{三六}導以色列人攜金銀出之、支派之眾無病者、^{三七}其出埃及即喜悅、蓋彼曾懼之、^{三八}主乃布雲為蓋、發火為光於宵、^{三九}民祈、主即令鶉集、且以天糧令伊等得飫、^{四〇}主綻石水即出、流於陸若河、^{四一}蓋伊念其予其僕亞伯拉罕之聖言、^{四二}且引其民歡欣而出、彼所選者亦喜樂而出、^{四三}伊以列邦之土賜伊等、令其享列民之劬勞、欲伊等遵主之規守主之法。

榮光讚詞

第十五分 第一百五聖詠

一爾曹讚榮主、蓋伊乃善者、因伊恩慈永存、
二孰能論主之鴻能、孰能盡述主之讚榮、三福哉、
遵循審判者、時行公義者、四主以施爾民之恩、
而念我、以爾之救臨至我、五為我獲見爾選人之
福、以爾民之喜而獲喜、偕爾之嗣業、而誇耀、
六我儕與祖之犯罪相同、已行乖僻、已作違理、
七我列祖在耶吉撇突時、不識爾之奇跡、弗念爾
盛大之恩慈、乃於海即紅海而悖逆、八第伊為己
名而拯救彼等、為令人見其全能、九伊向紅海厲
言、彼即竭矣、且令彼等過深淵如平陸、十且救
之於恨怨手、且救脫彼等於仇敵手、十一乃以水湮
其仇敵、並一弗遺、十二彼等信主言、以讚美詞歌
頌之、十三惟民倉猝時、忘爾之功、不俟爾之旨、
十四乃貪私慾於曠野、試上帝於荒郊、
十五伊賜彼等所求者、惟令其靈受疫、

^{十六}於營內嫉妬摩西、及主之聖者亞倫、
^{十七}地即綻口、吞達芳、且傾覆阿微喇木之黨、
^{十八}火焚彼黨中、煙焰燬盡此眾惡者、^{十九}乃造
犢於曷利福且拜彼偶像、^{二十}易其光榮、如食草
之牛形、^{二十一}而忘救之者、曾行大事于埃及者、
^{二十二}施奇跡于含地、及可驚懼事、於紅海之上帝、
^{二十三}主願滅伊等、惟其所選之摩西立其前、乘間
挽主之怒、免主滅伊等、^{二十四}民輕藐所慕之地、
弗信主言、^{二十五}乃于幕中怨之、弗聽主之聲、
^{二十六}是以主舉手至其身、令伊等顛仆于曠野、
^{二十七}且令其裔顛仆於列邦、蕩析於各國、^{二十八}民倚
瓦阿喇斐郭兒、而食無靈者之祭物、^{二十九}又以其所
行而激上帝、故瘟疫流行於彼中、^{三十}彼時、斐涅
耶斯起、行審判、瘟疫始止、^{三十一}其獲以此稱義於
世乃無窮世、^{三十二}伊等致上帝怒、於蔑利瓦之水、
摩西為之受難、^{三十三}蓋彼等憂鬱其靈、伊以口犯
罪、^{三十四}彼等未曾滅主所命於彼等之異邦、^{三十五}但
於異邦雜處、而效其所行、^{三十六}事彼罪網之偶像、
^{三十七}以己子女獻祭於魔、^{三十八}流無辜之血、即其祭
迦南偶像之子女血、故其地為血所污、^{三十九}因其所

作而自污、其罪係邪僻、^{四〇}是以主發怒於其民、憎棄其嗣業、^{四一}以伊付於列邦之手、其仇怨者制之、^{四二}其仇敵虐抑之、伊乃伏於其仇敵之手、^{四三}主屢釋之、第伊以其固執悖主、因其惡而輕之、^{四四}主聞其呼籲、即憐顧其愁苦、^{四五}憶念伊等之誠約、依其仁慈而悔易、^{四六}令其於掠劫者之前蒙慈憐、^{四七}主我儕之上帝、救我儕、自列邦中集我儕、為讚揚爾之聖名、且因爾榮光而誇耀、^{四八}主以色列之上帝、實當受讚美、永世無盡、萬民宜云阿民、阿民。

榮光讚詞

第一百六聖詠

^一爾曹讚榮主、蓋伊乃善者、因伊恩慈永存、^二似此必謂主所救者、即於仇敵手所救者、^三乃自東自西自北且自海涯、各處所集聚者、^四伊等遊行僻途於曠野、弗遇人所居之域、^五忍饑及渴、伊等之靈受消化、^六其憂愁時呼籲主、即脫之於其患難、^七復攜之行正路、使獲至人所居之域、^八宜讚揚主以其所施之恩慈、及其所施予人子之

奇跡、^九蓋渴者之靈、伊曾足之、饑者之靈、曾以善飫之、^十伊等坐於昏暗死之蔭中、以憂愁及鐵索被縛者、^{十一}因其背逆上帝之言、輕忽至上者之旨、^{十二}主以劬勞抑其心、其蹶無可助者、^{十三}其憂愁時呼籲主、即救之於其患難、^{十四}拯提之、出於昏暗、及死之蔭中、解其縛、^{十五}宜讚揚主以其所施之恩慈、及其所施於人子之奇跡、^{十六}蓋主劈銅門折鐵扃（jiōng/ㄐㄨㄥˊ/gwing¹）、^{十七}愚者因其違理之途、及其背義而受苦苦、^{十八}其靈厭諸食、且逼近死門、^{十九}其憂愁時呼籲主、即救之於其患難、^{二十}主降諭而療之、脫之於壙、^{二十一}宜讚揚主以其所施之恩慈、及其所施於人子之奇跡、^{二十二}宜獻以讚美之祭、以歌頌傳揚其所行、^{二十三}乘桴浮海、行事于大水者、^{二十四}見主所為、見其奇跡於深淵、^{二十五}謂主示諭、則烈風起、騰海波、^{二十六}上升於天、復入於深淵、伊等之靈、因危險而銷、^{二十七}翻轉動搖如酣者、其智慧無可如何、^{二十八}其憂愁時呼籲主、即提之於其患難、^{二十九}令狂風變安靖、其波始平息、^{三十}伊等即喜、因其得安、主攜之至其所冀之埠、^{三十一}宜讚揚主以其所施之恩慈、及其所施於

人子之奇跡、^{三二}應於民之會稱揚之、於長老之座讚美之、^{三三}主化河為野、化水泉為稿壤、^{三四}化沃壤為鹵地、因居於彼者之罪惡、^{三五}化野為沼、稿壤為水泉、^{三六}令餒者居之、建其可居之域、耕田植葡萄園、其實繁衍、^{三八}主降之福、令其加多、弗容其牲減少、^{三九}因窘迫及患難及憂愁、伊等減損而仆、^{四十}主為人君者、極被輕侮、令之遊行于無路之荒野、^{四一}興貧寡者於患難中、令其嗣如羊羣、^{四二}義人將見此而悅、惡者悉塞其口、^{四三}孰為智者、必鑒察此事而審識上帝之恩慈。

榮光讚詞

第一百七聖詠

^一我心已定、上帝歟、我心已定、上帝歟、我心已定矣、我將歌且頌、我之讚揚當始、^二我之琴瑟當作、我將早起、^三主歟、我將讚頌爾於萬民中、歌頌於異邦間、^四蓋爾之恩高於天、爾之真實至於雲表、^五願上帝升於諸天之上、而爾之榮光滿於普地、^六使爾親愛者獲救、以爾右手救而聽我、^七上帝於聖所言曰、我將獲勝、分錫葉木而度量莎

克豁福之谷、^九噶刺阿德屬我瑪納錫阿亦屬我、
耶福咧木乃我首之堅固、猶大乃我之權衡、^十摩阿
烏為我之浴桶、我將舒我靴於耶多木於斐利斯提
木地、爾可歡籲於我、^{十一}孰將引我進鞏固之城、
誰能導我至耶多木、^{十二}豈非上帝乎、曾棄我而
今不偕我兵共出者乎、^{十三}祈賜助我等於狹難中、
蓋因人之護佑乃虛枉者、^{十四}倘偕上帝則我儕將顯
氣力、伊必降抑我儕之仇敵。

第一百八聖詠

^一我讚頌之、上帝歟、毋緘默、^二蓋極惡且詐
之口所啟、以詭譎之舌向我言、^三以怨言環我、
無故與我相爭、^四以我之愛易為我之仇事、我即
祈禱、^五彼以惡酬善、以怨償我之愛、^六願主令違
理者轄制之、令魔立於其右、^七願其受審判時定
其罪、願其禱易為罪、^八願其時日促、他人獲其
位職、^九願其子孫為孤、妻為嫠、^十願其子流離、
流離而乞丐、于敗壞之地求食、^{十一}願債主奪其
所有、外人掠其所劬勞者、^{十二}願無人以慈憐施
予之、無人施恩予其孤子、^{十三}願其裔斷絕、其

名銷於後世、^{十四}願主前其列祖之惡被記憶、其母之罪不消除、^{十五}願其嘗於主面前、為消除其號於地、^{十六}其弗憶施恩慈、乃窘迫貧窮之乞丐及焦心者、為致死伊等、^{十七}其既好詛咒、是以詛咒臨之、其既不喜祝福、是以祝福遠之、^{十八}願其以詛咒自服如衣、願詛咒已如水入其腹、如油入其骸、^{十九}願此詛咒似其所服之衣、願其恒束此帶、^{二十}主如此報復凡為我仇敵、及以謗言攻我靈者、^{二十一}主歟、主因主名善輔我、蓋爾之恩慈乃善者、祈救我、^{二十二}蓋我乃貧乏乞丐、心中毀傷、^{二十三}我逝如晷之斜、我被逐如蝗、^{二十四}我膝因守齋而罷乏、我軀消瘦、^{二十五}為其所誚、其見我則搖首、^{二十六}主我之上帝、輔助我、依爾之恩慈而救我、^{二十七}願其必識此乃爾之手、此乃爾所行者、^{二十八}其將施詛咒、爾將施祝福、其興起即被辱、惟爾僕將喜悅、^{二十九}願我之敵將服辱如衣、以愧自蔽如裳、^{三十}我以我口惟高聲讚主、且於眾中讚揚之、^{三十一}蓋伊必立於貧寡者之右、為救其靈於審判之者。

榮光讚詞

第十六分

第一百九聖詠

一主向我主云、爾坐我右、至我以爾仇置爾足下、二主自錫安、將遺爾能力之杖、爾可宰治於爾仇敵中、三於爾能力時、爾民齊備於聖之美、爾自腹生於黎明前似露、四主曾設誓、必弗自悔、爾依麥基洗德之班秩為司祭、直至永遠、五主在爾右、其發怒之期、擊列王、六其必施審判於列邦、其以屍盈地、已擊首於寬曠、七於道旁泉必飲水、以此必翹首。

第一百十聖詠

一主歟、我一心讚揚爾、於義德之議論中及會中、二主所為乃極大、願其所喜愛者、三主所為榮且美、其公義永存、四主令人念其奇跡、主乃哀矜鴻恩者、五賜糧予敬畏之者、永年其誠約、六曾以所為之能力顯於其民、為賜以異邦之嗣產、七主手

之動作乃真實、及公義、其誠命係誠者、^八堅固於世
世、以真實及公義立基、^九主曾施救護於其民、設約
於恒久、其名乃聖而可畏者、^十智慧之原始、乃畏主
之畏、守成其誠命者確聰明、主之讚揚必永存。

第一百一十一聖詠

^一福哉、凡敬畏主者、及極喜其命者、^二其裔于地
必有力、義德者之世、必護福、^三富貴於其家、其義永
存、^四義德者之光、於暗中興起、即善及仁及義者、
^五善人係施恩借予人者、其審判時所言、乃確實者、
^六必永弗撼搖、義者必永被懷念、^七且弗懼不善之風
聲、其心倚賴主乃堅固、^八其心乃堅固、見其仇敵時而
無懼、^九彼曾散施周濟、其義永存、其角必以榮耀升
舉、^十惡者見之則厭、切齒而消化、惡者所欲必滅。

榮光讚詞

第一百一十二聖詠

^一主之僕且讚揚、讚主之名、^二願主之名被
祝讚、自今至恒久、^三由日昇直至日落之處、願
主名被讚揚、^四主崇於萬民、爾之光榮逾於天、

^五孰知我主上帝、即處於高區者、^六于上帝于地、作俯觀者、^七自塵土提拔貧乏者、自泥塗升舉窮困者、^八使其與列王即其民之列王偕坐、^九令不孕之婦而為有子、歡欣之母、安處于家中。

第一百十三聖詠

^一以色列出埃及時、雅各家離異民時、^二則猶大為主之聖所、以色列為主之轄地、^三海一見之而急逝、約旦退縮、^四山陵躍如羝、丘垤（dié/勿一廿' /音秩，dit⁶）躍如羔、^五海因何事令爾急逝、約旦因何事令爾退縮、^六山陵因何事令爾躍如羝、丘垤因何事令爾躍如羔、^七地於主前、於雅各之上帝前、爾宜震動、^八主化磐石為沼、化石為水泉、^九主歟、非予我儕、非予我儕、乃於爾之名、緣爾之恩慈及真理、而錫光榮、^十胡為列邦云、其上帝何在、^{十一}我儕之上帝於天於地、隨意而行、^{十二}惟列邦之偶像、乃銀與金者、係人手所造者、^{十三}彼有口而弗言、有目而弗見、^{十四}有耳而弗聽、有鼻而弗嗅、^{十五}有手而弗拊、有足而弗行、其喉不發聲、^{十六}造之者倚之者、與之相似、^{十七}以色

列家、宜倚冀主、乃我儕之輔助及護佑、^{十八}亞倫家、當倚冀主、乃我儕之輔助、及護佑、^{十九}敬畏主者、當倚冀主、乃我儕之輔助、及護佑、^{二十}主記念我儕、降福我儕、降福於以色列家、將福於亞倫家、^{二十一}降福於敬畏主者、無論大小、^{二十二}願主增益爾眾、增益爾曹、及爾曹之子孫、^{二十三}爾曹被主、即創天地者、所祝福、^{二十四}彼天乃主者、地主曾以之賜人子、^{二十五}讚美上帝、非亡人、亦非入於墳墓者、^{二十六}惟我儕生活者、必欲讚頌主、自今至無窮世。

第一百四聖詠

^一我喜悅、因主聆我聲、我之祈禱、^二傾耳聽我、以此我將于我諸日呼籲主、^三致死之病環我、地獄之苦難臨至我、我罹於迫制且憂愁中、^四乃籲求主名云、主歟、救我之靈、^五主乃施恩且公義者、我儕之上帝、懷慈憐者、^六主乃護庇無知識者、我疲弱主即施助於我、^七願我靈歸爾之安慰處、蓋主曾施恩予爾、^八蓋爾已救我靈於死、我目於淚、我足蹶、^九我必于有生之地而行于主前。

榮光讚詞

第一百十五聖詠

一我確信而言、我被焦慮、二我惶遽時、謂人皆虛幻、三我何以報主所施於我之恩、四我將以拯救之爵、籲求主之名、五我所許於主、必於彼眾民之面前而償、六聖者之死、於主目前為貴、七主歟、我乃爾之僕、我乃爾之僕、爾婢之子、爾釋我之縛、八我將以讚揚之祭獻爾、籲求主之名、九我所許於主、必於彼眾民之面前、十於主之院、於耶路撒冷中而償。

第一百十六聖詠

一萬民、爾曹宜讚揚主、眾族、爾曹當尊榮之、二蓋其所施於我儕之恩慈大矣、主之真實永存。

第一百十七聖詠

一爾曹讚榮主、蓋伊乃善者、因伊恩慈永存、二願以色列家言、伊乃善者、其恩慈永存、三願亞倫家言、伊乃善者、其恩慈永存、四願敬畏主者言、伊乃善者、其恩慈永存、五我迫狹時呼籲

於主、伊即應我、引於綽裕處、^六主護佑我、我則弗懼、人能何所行於我、^七主係輔助我者、是以我將見仇我者、^八賴主較倚恃人為善、^九望上帝較倚恃列王尤善、^十萬民環我、我藉主名已抑之、^{十一}彼環我、彼圍我、我藉主名已抑之、^{十二}彼環我如蜂之環蜜、乃被消滅、如棘之火、我藉主名已抑之、^{十三}爾已欲刺我、意欲傾仆我、藉主扶持我、^{十四}主乃我之力、我之歌頌、其為我之救、^{十五}於義者之宅、有歡欣、及施救之聲、主右手行奮勇、^{十六}主之右手高舉、主之右手行奮勇、^{十七}我非幾死乃猶生活者、必傳述主之所行、^{十八}主已厲責我、惟未以我付於死、^{十九}願為我闢道義之門、我欲入、我將讚榮主、^{二十}此乃主之門、義者必入、^{二十一}我讚榮爾、蓋爾曾聽我、為我之救、^{二十二}工師所棄之石、成為隅首、^{二十三}此乃上帝所為、我儕目而奇之、^{二十四}此乃主所建之日、我儕因此將歡欣喜樂、^{二十五}主歟救我、主歟輔助我、^{二十六}以主名來者實已滿被讚揚、自主之堂、我儕讚揚爾、^{二十七}上帝乃主、以光照我儕、宜以繩繫牲攜至祭台之角、^{二十八}爾乃我之上帝、

我將讚榮爾、爾乃我之上帝、我將稱頌之、我將讚榮爾、因爾聆我、為我之救、^{二九}爾曹讚榮主、蓋伊乃善者、因伊恩慈永存。

榮光讚詞

第十七分 第一百十八聖詠

^一福哉、無玷而行者、係率履於主之法律、
^二福哉、遵守其默示、純心覓之者、^三伊等弗行違理於主之路而行、^四爾命人固守其命令、^五苟我道使直、為守主誠律、^六其時我視主之誠命、必不承羞、^七我以正心讚榮爾、我效其公義審判、^八我必守爾之誠律、毋盡棄我、^九年少者何以潔己之路、係以爾命自遵守、^十我盡心求爾、毋令我避爾之誠命、^{十一}我心中藏爾之言、為不犯罪於爾前、^{十二}主歟、爾乃被讚揚者、求以爾誠律訓諭我、^{十三}我以己口傳述爾口之審判、^{十四}我行爾默示之道、悅之如諸貨財、^{十五}我將默思爾之誠命、敬顧爾徑、^{十六}我以爾之誠律喜慰、弗忘爾言、

^{十七}顯恩於爾僕、為我獲生命、可守爾言、^{十八}開我目即能曉爾法之奇妙、^{十九}我在地為旅客、毋秘爾之誠命於我、^{二十}我靈時時竭力念爾之審判、^{二十一}爾於驕傲者、被詛者、凡爽其誠命者制之、^{二十二}求離毀謗及輕視於我、蓋我遵守爾之默示、^{二十三}列王坐而議我、第爾僕默念爾之誠律、^{二十四}爾之默示為我所喜慰、爾之誠律為我之謀、^{二十五}我靈附於塵、依爾言甦我、^{二十六}我陳述我經歷之途、而爾聽我、求以爾誠律誨我、^{二十七}令我悟爾命令之道、我心默念爾之奇蹟、^{二十八}我靈因憂而銷、求依爾言堅固我、^{二十九}離詭詐之途于我、施我以爾之法律、^{三十}我擇真實之途、爾之審判立於我前、^{三十一}主歟、我曾戀爾之默示、毋令我受辱、^{三十二}爾寬我心時、我趨至爾誠命之途、^{三十三}主歟、以爾誠律道指示我、我即遵守至竟、^{三十四}訓啟我即遵守爾法律、以一心守之、^{三十五}置我於所命之途、蓋此乃我所悅者、^{三十六}令我心向爾之默示、而弗向貪欲、^{三十七}令我目不視彼虛偽、令我甦於爾之途、^{三十八}堅固爾言於爾僕、因其敬畏爾、^{三十九}銷除我所懼之謗、蓋爾之審判乃善者、^{四十}我慕爾之命令、以爾真實

甦我、^{四一}主歟、願爾之恩慈臨至我、依爾言以爾之救臨至我、^{四二}我則克答彼侮我者、因我賴爾言、^{四三}毋盡去此真實之言離我口、蓋我冀望爾之審判、^{四四}我必恒久遵守爾法至無窮世、^{四五}且我將行於綽裕處、蓋我素求爾之命令、^{四六}我將於列王前談爾之默示、而弗恥、^{四七}我心喜慰爾之誠命、即我所慕者、^{四八}我將舒我手向爾之誠命、即我所慕者、我定默思爾之誠律、^{四九}願爾記憶與爾僕之言、因爾曾令我冀望之、^{五十}於我苦難時爾言甦我、斯為我之安慰、^{五一}驕傲者譏我至極、第我不離爾之法、^{五二}主歟、我記憶爾諸世前之審判而自慰、^{五三}我見惡人棄爾之法、則甚驚懼、^{五四}我於為旅客之室、恒以爾之誠律為我之歌頌、^{五五}主歟、我於宵記憶爾名、且遵守其法、^{五六}此乃屬我者、因我遵守爾之命令、^{五七}主歟、我謂遵守爾言、乃我之分、^{五八}我曾純心求爾、依爾言矜憐我、^{五九}我曾思我之途、而轉足於爾之默示、^{六十}我迅速弗遲、遵守爾命、^{六一}惡網環我、第我不忘爾之法、^{六二}我中宵興起讚頌爾、因爾公義之審判、^{六三}凡敬畏爾者、遵守爾之命令、我與之為儔、

六四主歟、地上以爾之恩慈充滿、以爾之誠律誨我、六五主歟、爾已依其言善待其僕、六六祈爾以良善明悟及智訓我、蓋我信爾命、六七我未受難苦之先、即遊於昏迷中、今祇遵守爾言、六八主歟、爾乃善者、且行善、以爾之誠律誨我、六九驕傲者、造妄言攻我、我惟純心遵守爾之命令、七十其心胖如脂、我以爾法喜慰、七一我受苦難、為我克習爾之誠律、此乃為我之善、七二爾口之法貴值金銀千千、我以之為善。

榮光讚詞

七三爾手造我成我、求爾訓我、為我習爾之誠命、七四敬畏爾者、見我則喜、蓋因我冀望爾言、七五主歟、我知爾審判乃公義者、爾乃依公義責我、七六願爾之恩慈、依爾於爾僕所言、為我之安慰、七七願爾之慈憐臨至我、我即獲生命、蓋爾之法系我所愛者、七八願彼驕傲著蒙羞、蓋其無故迫制我、我默念爾之命令、七九凡敬畏爾者、及識爾之默示者、願其歸我、八十願我心無玷於爾之誠律、為我弗承羞、八一我靈銷於慕爾之救、我祇冀望爾言、八二我目銷於候爾之言、我謂爾待何時安

慰我、^{八三}我如煙中之皮囊、第我未忘爾之誠律、
^{八四}爾僕之日有幾何、爾何時行審判于凌虐我者、
^{八五}驕傲者、悖爾之法、為我掘阱、^{八六}爾之誠命
皆真實、眾無故凌虐我、求爾輔助我、^{八七}伊等
幾欲滅我於地上、第我弗棄爾之命令、^{八八}依爾恩
甦我、我必遵守爾口之默示、^{八九}主歟、爾言永堅
立於天、^{九十}爾之真實直至世世、爾立定地、地
即立、^{九一}依爾之命令、伊至今尚存留、因悉為
爾之服事、^{九二}倘爾法不為我之安慰、我即消亡於
患難中、^{九三}我永弗忘爾之命令、蓋爾以此甦我、
^{九四}我屬爾救我、蓋我素求爾之命令、^{九五}惡人伺我
欲害我、惟我洞徹爾之默示、^{九六}我已見純全之經
界、惟爾之誠命乃無垠、^{九七}我慕爾法何如之甚、
我終日默念之、^{九八}以爾之誠命、使我智勝於我仇
敵、因此誠命永偕我、^{九九}我之穎悟逾於我師、
蓋以爾之默示我默念之、^{一百}我之通徹、逾于
老者、蓋因我遵守爾之命令、^{百一}我弗令足行於
諸惡途、為守爾言、^{百二}我弗離爾之審判、蓋爾
訓我、^{百三}爾言於我喉何如之甘、于我口中甘逾
於蜜、^{百四}我以爾之命令被啟悟、是以疾諸詭詐之

途、^{百五}爾言為我足之燈、為我途之光、^{百六}我設誓遵守爾公義之審判、即願成之、^{百七}主歟、我受壓制至極、依爾言甦我、^{百八}主歟、求爾納我口甘願之祭獻、且以爾審判誨我、^{百九}我靈恆於我手、第我弗忘爾之法、^{百十}惡者列網於我前、第我弗離爾之命令、^{百十一}我受爾默示為嗣業於永世、蓋此乃我心中所悅者、^{百十二}我傾我心、為成爾之誠律于永世至終、^{百十三}我疾人之虛偽、我惟愛爾之法、^{百十四}爾乃我之柝幪、及我之盾、我冀望爾言、^{百十五}行惡者、爾曹當離我、我必遵守我上帝之命、^{百十六}求依爾所言堅固我、我必獲生命于所冀望者、弗承羞、^{百十七}扶助我我必獲救、我即恆顧爾之誠律、^{百十八}悖棄爾誠律者、爾悉擯擲之、蓋伊等之謀慮、乃詭詐、^{百十九}地上之惡者爾皆除之如滓、是以我愛爾之默示、^{百二十}因敬畏爾、而我肉軀戰慄、我且懼爾之審判、^{百二十一}我行審判及公義、毋付我於凌虐我者中、^{百二十二}求護佑爾僕得善、弗容彼驕傲者侮我、^{百二十三}我目銷化於候爾之救、及爾公義之言、^{百二十四}依爾慈憐待爾僕、以爾誠律誨我、^{百二十五}我乃爾僕、求誨我、我必能喻爾之默示、^{百二十六}事主之時

已至、蓋人已廢爾之法、^{百二七}我愛爾命逾于金及精金、^{百二八}我以爾之諸命令為真正者、且疾詭詐之諸途、^{百二九}爾之默示、乃奇妙者、故我靈守之、^{百三十}啟爾默示之辭、光照及訓誨愚者、^{百三一}我啟口而喘、因我渴望爾之命。

榮光讚詞

^{百三二}求爾回顧我矜憐我、與愛爾名者同、^{百三三}堅固我之足於爾言中、毋容彼何罪轄制我、^{百三四}救我於人之凌虐中、我即守爾之命令、^{百三五}以爾面之光照爾僕、以爾之誠律誨我、^{百二六}我目流水泉、因弗遵守爾之法律、^{百三七}主歟、爾乃義者、爾之審判乃公義者、^{百三八}爾所命之默示、乃公義者、乃極真實者、^{百三九}我熱衷已蛀蝕我、因我仇敵忘爾言、^{百四十}爾辭極潔、爾僕愛之、^{百四一}我乃細微被輕忽、第弗忘爾之命令、^{百四二}爾義乃永義、爾法乃真者、^{百四三}困苦憂愁已遭逢於我、爾之誠命、乃我之安慰、^{百四四}爾默示之真理乃永存、誨我、我則獲生命、^{百四五}我純心呼籲爾、主歟、聽我、我必遵守爾之誠律、^{百四六}

我籲求爾救我、我必遵守爾之默示、^{百四七}我于黎明
前呼籲爾、我冀望爾言、^{百四八}我目寤於宵更之前、
為可以洞微爾言、^{百四九}主歟，依爾恩慈聆我聲、
依爾之審判甦我、^{百五十}謀詭詐者邇矣、彼乃遠離
爾之法^{百五一}主歟、爾乃邇、爾之諸命、係真者、
^{百五二}我自昔以爾之默示、知爾立定於世世、
^{百五三}求顧我困厄而救我、蓋我弗忘爾之法、
^{百五四}祈伸理我之訟詞、及保護我、依祈伸
理我之訟詞、及保護我、依爾言甦我、^{百五}
^五拯救離夫惡者、蓋伊等弗索求爾之誠律、
^{百五六}主歟、爾之鴻恩極多、依爾審判甦我、
^{百五七}逼害驅逐者極眾、我猶弗離爾之默示、
^{百五八}我見悖逆者而憂之、因其不守爾言、
^{百五九}視我愛爾之命令何似、主歟、依爾之恩
慈甦我、^{百六十}爾言之本乃真者、凡爾公義之
審判乃永存、^{百六一}列王無故凌虐我、我心惟
懼爾之言、^{百六二}我以爾言而喜如獲大利、
^{百六三}妄言我忿之厭之、惟爾之法我愛之、
^{百六四}我日七次讚揚爾、因爾公義之審判、
^{百六五}愛爾之法者、獲大平安、毫無阻礙、

百六六主歟、我倚望爾之拯救、行爾之誠命、五六七我靈守爾之默示、我愛之至極、百六八我遵守爾之命令、及默示、蓋我途皆在爾之面前、百六九主歟、願我呼籲至爾面前、依爾言誨我、百七十願我祈禱至爾面前、依爾言救我、百七一我口將發讚揚、於以其誠律誨我時、百七十二我舌必述爾言、蓋爾之誠命純係公義、願爾手為我之助、蓋我擇爾之命令、百七四主歟、我渴望爾之拯救、爾法乃我之喜慰、百七五願我靈獲生、而讚揚爾、願爾之審判輔助我、百七六我迷失如亡失之羊、祈覓爾僕、蓋我弗忘爾之誠命。

榮光讚詞

第十八分 第一百十九聖詠

一我于愁苦時呼籲主、而伊允我、二主歟、救我靈於詭詐之口、於虛妄之舌、三詭詐之舌能以何予爾、能以何加爾、四彼恰似勇毅之利矢、野草之熱炭、五禍災於我、因我於摩莎合為可惜、於乞達兒至墓側而居、留我靈與彼和

睦者、偕居已久、^七我惟安和、第我出言伊等必爭戰。

第一百二十聖詠

^一我舉目觀山、我之扶助自彼來、^二我之扶助由造成天地之主、^三伊必不令爾足搖撼、守爾者弗寐、^四讚守以色列者、弗倦弗眠、^五主乃爾之護守者、主係爾之庇蔭、^六晝日不暴爾、夜月不損爾、^七主將護守爾於諸患難、主將護守爾靈、^八主將護守爾之出入、自今直至無窮世。

第一百二十一聖詠

^一我喜人向我云、我儕可以進主堂、^二耶路撒冷、我儕之足立爾門、^三耶嚕薩利木乃建如緊密之城、^四來此諸支、即主之支派、依以色列規例起、而讚揚上帝之名、^五於此設審判之寶座、大衛家之寶座、^六爾曹宜為耶路撒冷祈平安、願愛之者獲平安、^七願都內享和睦、宮中獲平安、^八因我弟兄及親近故、我云平安於爾、^九因上帝我之堂、我願爾得善。

第一百二十二聖詠

一居於天者、我舉目望爾、二如僕目望主人之手、如婢目望主母之手、我儕之目、如此望上帝我等主、直至其矜憐我等、三矜憐我等、主歟、矜憐我等、蓋我儕受輕藐、已厭足、四我儕之靈、因怠慢之凌辱、驕傲者、輕藐已厭足。

第一百二十三聖詠

一以色列必云、若非主偕我等、二人起攻我儕時、若非主偕我等、三則彼眾定發怒如焚、以攻我儕、必生燄我、四水必漫我等、泉必湮我等靈、五烈風之水必湮我等靈、六主被讚揚者、因其弗以我付於以其齒所嚙（niè/ㄋㄟˋ一ㄘㄛˋ / ngit⁶）者、七我儕之靈得釋、如鳥脫於捕者之羅、羅綻我等得救、八我儕之扶助、在彼造成天地之上帝名。

榮光讚詞

第一百二十四聖詠

一賴主者如錫安山弗搖撼、乃永在、二諸山周耶路撒冷、主乃環其民、自今至無窮世、三主必不使惡者之杖、在義者之業、為義者弗舒手往作慝（tè/去ㄛˋ /音剔，tik¹）、四主歟、施恩于善人及心正直者、五願主以迴轉行其曲徑者、必令其與作慝者同行、願平安歸於以色列。

第一百二十五聖詠

一主歸錫安被擄者之時、我儕如夢、二彼時、我儕之口盈喜樂、我之舌滿歌頌、其時在列邦者有云、主為眾民行大事、三主既為我儕行大事、我儕喜悅之、四祈主歸我儕被擄者、如南流之水泉、五以淚播種者、將以樂穫、六以哭泣攜其種、以歡欣而來攜其麥穧（jì/ㄐㄧˋ /音滯，zai⁶）。

第一百二十六聖詠

一苟主弗建室、則建者徒勞、苟主不守城、則守者徒儆醒、二爾曹徒夙興晚眠、食憂勞之食、

惟主所愛者、歲寢亦錫之、^三子乃主所賜之業、娠婦所產、乃係賞賜、^四少年之子、如矢在勇士之手、^五福哉、以之實其弮者、必弗承羞、可以于闔闔向仇敵而語。

第一百二十七聖詠

^一福哉、凡敬畏主、而行其途者、^二爾必由己手之劬勞而食、其乃有福且得善、^三爾妻必如實繁之葡萄枝、於爾加帷、爾諸子將環爾席如青果枝、^四敬畏主者、必如此獲福、^五主必自錫安祝福爾、爾一生之諸日、必睹耶路撒冷之休盛、^六且爾獲見爾子之子、願平安歸以色列。

第一百二十八聖詠

^一以色列必云、自我幼時、伊多次迫我、^二自我幼時、伊多次迫我、第從未勝我、^三耕田者、犁於我背上、乃長其壟、^四主乃公義剖斷惡者之桎梏、^五願凡疾錫安者、承羞而卻、^六願其將如屋脊之草、未耘而枯、^七刈之者不

盈手、束之者弗盈握、^八過者亦弗云、願主之祝福歸爾曹、我藉主名而祝福爾。

榮光讚詞

第一百二十九聖詠

^一主歟、我自深淵呼籲爾、^二主歟、聆我聲、願爾耳聽我之禱聲、^三主歟、若究察罪惡、主歟、則孰能立、^四第爾施救宥、願人敬畏於爾前、^五我望主、我靈望主、冀望主言、^六我靈候主、踰於更漏之待旦、踰於更漏之待旦、^七願以色列冀望主、蓋鴻恩在主、大援亦屬之、^八伊將救以色列脫離諸罪惡。

第一百三十聖詠

^一主歟、我心不驕、目不仰、我弗入於我不逮之大事、^二我豈不安慰拊循我靈、如斷乳之嬰、我靈於我如斷乳之嬰、^三願以色列冀望主、自今直至無窮世。

第一百三十一聖詠

^一主歟、祈記憶大衛、及其焦急、^二伊曾設誓於主、許願於雅各之全能者、謂夫、^三我必真不

入我加之帷、亦弗登我榻、^四我弗容我目眠、弗容眉目盹息、^五迨我為主、獲一區、即為雅各之全能者、獲居處云、^六我儕聞其在耶福喇發遇之於伊阿喇木之田中、^七我儕可至主宅、匍伏于伊駐足之地、^八主歟、立于爾之安居所、爾與其能力之櫝、^九爾之諸司祭必服義、爾之聖人必喜悅、^十因爾僕大衛之故、毋轉面於爾之被傳油者、^{十一}主曾以真實設施於大衛、必不反復其誓、謂我將以爾腹之果、置之爾位、^{十二}爾嗣若守我約、及我所欲誨之默示、則彼嗣必永坐於爾位、^{十三}蓋主已擇錫安、欲以之為己宅、^{十四}此間永為我之安居所、我必居此、蓋此乃我所願者、^{十五}祝福歟、我必祝其糧、必以食饜彼貧寡者、^{十六}我於其司祭必以救服之、彼聖人必喜而悅、^{十七}於彼、我必令大衛之角萌長、我為所傳油者、置一燈、我於其諸仇敵必以羞恥服之、其冠冕必耀光。

第一百三十二聖詠

^一弟兄同居、何其善、何其美、^二此乃如寶膏在首、直流至髯、即亞倫之髯、復流至其裾、

三如降於錫安山爾孟之露、蓋在彼、主令降福、即永生。

第一百三十三聖詠

一令宜讚揚主、主之諸僕、宵間立於主室、即我上帝室之各院、二宜舉爾手向聖所、而讚美主、三造成天地之主必自錫安降福予爾。

榮光讚詞

第十九分

第一百三十四聖詠

一宜讚美主名、主之諸僕、宜讚美之、二即立於主室者、於我上帝室之各院、三讚美主、因其乃善者、宜歌頌其名、斯為甘美、四蓋主為己選雅各、及以色列為其業、五我曾知主乃至大、我儕之主崇於諸主、六凡主所願者、即行之於天於地、於海於諸淵、七令雲自地角起、於雨中作電、令風出其府庫、八伊擊埃及之首胎生者、自人至畜、九于埃及內施妙蹟奇事、臨至法老直至其僕、

^十復擊多民、滅有力之王、^{十一}即阿摩咧王明錫公、及瓦散王明鄂噶、及凡哈納按之諸國、^{十二}以其地賜伊等為產、即為其民以色列之產、^{十三}主歟、爾名乃永在者、主歟、以爾記之於世世、^{十四}蓋主將審判其民、且矜憐其僕、^{十五}異邦之偶像、乃金與銀者、人手所造者、^{十六}其有口而弗言、有目而弗見、^{十七}有耳而弗聽、且其口無氣、^{十八}造之者倚之者與之相似、^{十九}以色列宜讚揚主、亞倫家宜讚揚主、^{二十}利未家宜讚揚主、敬畏主者宜讚揚主、居於耶路撒冷之主、自錫安被讚揚。

第一百三十五聖詠

^一宜讚榮主、伊乃善者、因伊恩慈永存、^二宜讚榮諸主之主、蓋其恩慈永存、^三宜讚榮諸君之主、蓋其恩慈永存、^四獨行大奇蹟者、蓋其恩慈永存、^五以睿造天者、蓋其恩慈永存、^六定地於水上者、蓋其恩慈永存、^七造大光者、蓋其恩慈永存、^八即造日司晝、蓋其恩慈永存、^九造月星司夜、蓋其恩慈永存、^十伊擊埃及首胎生之子者、蓋其恩慈永存、^{十一}出伊等中攜以色列人者、蓋其

恩慈永存、^{+二}即以能力之手及導引之肱、蓋其恩慈永存、^{+三}伊分紅海者、蓋其恩慈永存、^{+四}令以色列得過海、蓋其恩慈永存、^{+五}遺法老及其兵於紅海、蓋其恩慈永存、^{+六}伊仍攜其民過曠野、蓋其恩慈永存、^{+七}擊數大國之主、蓋其恩慈永存、^{+八}戮有力之君者、蓋其恩慈永存、^{+九}即阿摩咧王錫公、蓋其恩慈永存、^{二+}瓦散王敖格、蓋其恩慈永存、^{二-}以其地賜其民為產、蓋其恩慈永存、^{二二}即為其僕以色列之產、蓋其恩慈永存、^{二三}伊曾記憶我儕於微賤時、蓋其恩慈永存、^{二四}救我儕於我仇敵中、蓋其恩慈永存、^{二五}以糧賜凡有肉軀者、蓋其恩慈永存、^{二六}宜讚榮天上之主、蓋其恩慈永存。

第一百三十六聖詠

^一我儕曾坐於巴比倫諸河之干、憶錫安即哭泣、^二於彼中我儕懸琴于柳、^三蓋因在彼擄劫我儕者、強我儕歌頌之言、凌迫我儕者、強我儕歡樂、調常為我儕錫安之歌頌、^四我儕在異邦豈歌頌主之歌頌乎、^五耶路撒冷乎我若忘爾、即願我右

手忘我、耶路撒冷乎，我若弗憶爾、凡我所喜悅者、弗以爾為最、則願我舌黏於我喉、^七主歟、為耶鐸木裔、記憶耶路撒冷之時日、而云、敗壞之、敗壞之、直至其基址、^八巴比倫可毀之女、福哉、凡報爾亦如爾待我儕者、^九福哉、以爾嬰碎之于石者。

榮光讚詞

第一百三十七聖詠

^一我盡心讚榮爾、且於諸主前歌頌爾、因爾聽我口之言、^二我向爾聖堂匍伏、且因其恩慈及真理讚榮爾名、蓋爾曾廣大其辭逾爾石、^三適我呼籲爾之日、爾允我、且以健壯入我靈、^四主歟、地之列王、聞爾口所言者必讚榮爾、^五即歌頌主之途、蓋主之榮光為大、^六主乃崇高、猶顧卑微者、第於驕傲者則遙識之、^七我若行於苦難中、爾將甦我、舒爾手攻我仇敵之怒、以爾右手將救我、^八代我報復、主歟、爾恩慈永存、毋棄爾手所造者。

第一百三十八聖詠

一主歟爾曾察試而識我、二我坐我起、爾知之、爾自遐方、而知我之念慮、三我途徑、我休息、爾環我、凡我之途、爾知之、四主歟、我舌未發言、而爾無不深知之、五爾環我前後、爾手撫於我上、六識爾乃為我奇妙者崇高者、我不可測之、七我焉往得避爾之神、焉往得逃爾之面、八我若升天、爾即在彼、若降於地獄、爾亦在彼、九我若乘朝霞之翼、或居於海濱、十於彼、爾手亦率我、爾右手持我、十一倘我言昏暗覆我、我所環之光明、將易為黑夜、十二則昏暗不能蔽我於爾前、夜亦光照如日、昏暗若何、彼光明亦如之、十三蓋爾造我臟腑、於我母之腹造我、十四我讚榮爾、因我奇妙之受造、爾所為奇異、此乃我靈所確知者、十五我被造於隱秘、我被造於腹之深時、我骸骨弗隱藏於爾、十六爾之目見我於胚朕時、為我所定之年日、未屆其一、已皆紀於爾冊、十七上帝歟、爾之念慮、為我何其崇大、彼數何其多、十八我欲籌之、第其多、多於沙、我寤尚與爾偕、十九上帝

歟、戮惡人、喜流血者宜離我、^{二+}伊等以惡言稱述爾、爾仇敵妄謀、^{三一}主歟、疾主者、我豈弗疾之、攻主者、我豈弗厭惡之、^{三二}我以痛恨疾之、以之為我仇敵、^{三三}上帝歟、察試我、而知我心、試我而知我意、^{三四}見我有何險徑、乃導我於恒久之途。

第一百三十九聖詠

^三主歟、救我於惡者、護佑我於凌迫者、^三伊等心中謀害、累日備戰、^四伊利其舌如蛇、其唇匿虺（huǐ/ㄍㄨㄟˇ /音委，wai²）毒、^五主歟、守我脫惡人之手、護佑我於凌迫者、即欲令我足搖撼者、^六驕傲者為我覆機獲（huò/ㄍㄨㄛˋ /音獲，wok⁶）及圈套、為我張網於道、為我設罟、^七我曾向主云、爾乃我之上帝、主歟、聽我禱聲、^八主歟、主歟、我救之力、爾曾蒙我首於戰期、^九主歟、毋允凶人所欲者、毋令其策謀克成、其將自傲、^十願環我之首、其已唇之害累、必覆之、^{十一}願熱炭將投於其上、願彼將令其落於火中、在深阱內、不復得起、

^{十二}惡舌者弗獲堅立於地、惡必牽援凌迫者於滅亡、^{十三}我知上帝必施審判於受厄者、施公義於窮乏者、^{十四}是以義者將讚榮爾名、無玷者必居於爾面前。

榮光讚詞

第一百四十聖詠

^一主歟、我呼籲爾、祈速聽我、我呼籲時、祈聽我禱聲、^二願我之禱如爐香陳於爾面前、我舉手獻如暮祭、^三祈主立守者於我口、且禁我口之門、^四毋令我心偏向惡言為謝偕作慝者作慝、亦弗榮我食伊等之珍饈、^五願義者罰我以為恩慈、願譴我以為極美之膏、其膏不能病我首、第我祈禱為解伊等之惡事、^六其官長被散于石、聽我言以為溫柔、^七伊等如土剖分為段於我等、我儕之骸被散於地獄之口、^八主歟、主歟、第我目向爾以爾為冀望、毋推卻我靈、^九守我脫伊等為我所設之機檻、及行惡者之羅、^十惡者必自觸其網、惟我得過。

第一百四十一聖詠

一我以聲呼籲主、以聲向主禱、二我挹我禱於其前、我剖分我憂於其前、三我靈倦於心內時、爾識我之途、伊等在我所行之路暗覆網罟、四我向右而視、無人識我、我無投避處、無人顧我靈、五主歟、我曾呼籲於爾云、爾乃我之投避處、及我所生之地之分、六祈聽我之呼籲、因我極疲倦、救我於逼害我者、因伊等較我有力、七拯我靈出獄岸、為我克讚頌爾名、爾以恩寵顯於我時、義者將環我。

第一百四十二聖詠

一主歟、聆我祈、依爾之真實納我禱、依爾之公義聽我、二毋與爾僕訟質、因凡有生者、無一能表白爾前、三仇敵逐我靈、擲躡我生命於塵土、令我如久死者居於昏暗、四我靈鬱悶於我衷、我心癡呆、五追思古時、記憶爾之諸行、默思爾手所作者、六我舉手向爾、我靈向爾如旱地之渴、七主速聽我、我靈疲乏、毋蔽爾面於我、為不使我

如入墓者、^八允我早聽爾之恩、因我冀望爾、主指示我、以我當行之途、因我舉我靈向爾、^九主救我於我之仇敵、我投依於爾、^十訓我遵爾之旨、蓋爾係我之上帝、願爾之善神導我於公義之地、^{十一}主因爾之名蘇我、以爾之公義拯提我靈自苦難中、^{十二}因爾之恩慈、滅我之仇敵、夷諸制壓我靈者、因我係爾之僕。

榮光讚詞

第二十分 第一百四十三聖詠

^一主被讚揚者、我之堅固、教我手戰鬥、誨我指攻擊、^二我之恩憐、及圍護我之投避處、及我之救者、我之藩屏、我所倚賴者、伊令我民順屬我、^三主歟、人為誰、爾識之、人子為誰、爾眷顧之、^四人如嘯、其日如晷之逝、^五主歟、今天垂而降臨、拊山令其起煙、^六掣電潰之、射爾之矢敗之、^七自上舒爾手、脫我救我出大川於異邦人之手、^八其口妄言、其右手乃詭詐之右手、^九上帝歟、我

將以新歌歌頌爾、我將以十絃之樂器奏樂於爾、
十乃令列王獲救者、且脫離爾僕大衛於致害之刃者、
十一脫我救我於異邦人之手、其口妄言、其右手乃詭詐之右手、
十二願令我子、如稚時長成之植物、令我女、如殿角雕刻之柱、
十三願令我倉充滿、各色具備、令我羊、滋生千千萬於我之牧地、
十四願令我牛肥、無劫無失、無報苦於我之衢、
十五福哉、此類之民、福哉、獲上帝為其主之民。

第一百四十四聖詠

一我上帝我君、我將稱頌爾、讚美爾名於
世世、二我將累日讚揚爾、讚美爾名於世世、
三主乃大者、宜讚美者、其大不可測、四歷代必讚
美其所為、亦宣揚其能力、五我將默念爾大威嚴
之光榮、及爾奇妙之事、六人將論爾、可畏行
事之大力、我亦將宣揚爾之威嚴、七人將稱爾大
善之記念、將歌頌其公義、八主乃鴻恩、乃慈悲、
乃恒忍、且大有憐憫、九主於眾人乃善者、且其鴻
慈於凡所造者、十主歟、願爾之所造者讚美爾、爾
聖人亦將讚榮爾、十一論爾國之光榮、言爾能力、

^{十二}為以爾能力、及爾國光榮之威嚴、示人之子、
^{十三}爾國乃永世之國、爾統轄直至代代、主所言乃
真實者、所行乃聖者、^{十四}主撫扶凡傾跌者、起
立凡仆倒者、^{十五}眾目冀望爾、爾隨時以糧賜之、
^{十六}主張手以恩慈飫眾生、^{十七}主乃公義於其諸途、
乃善於其所造者、^{十八}主乃邇近凡呼籲之者、即以
真實呼籲之者、^{十九}凡畏主者之所願、伊必成之、
聽其呼籲而救之、^{二十}主守凡慕之者、惟凡作惡者
滅亡、^{二十一}我口將述主之讚美、凡肉軀者必讚揚爾
聖名於世世。

榮光讚詞

第一百四十五聖詠

^一我靈宜讚美主、^二我尚生時將讚美主、我至
終讚頌我之上帝、^三毋倚侯王及人之子、因其弗
能拯救、^四彼氣既絕即歸其土、其所謀者即日消
亡、^五福哉、雅各之上帝所佑助者、冀望其主、
^六上帝係造成天地海及凡其中所有、而永守真實者、
^七為受窘迫者伸理、饑者賜之糧、主釋被掠者、
^八主開瞽者之目、起凡被屈者、主愛義德者、

九主護佑羈旅、賙恤孤子嫠婦、及消滅惡者之途、
十主將主宰至恒久、錫安乎、爾之上帝、宰於世世。

第一百四十六聖詠

一眾宜讚美主、蓋歌頌我儕之主乃善者、乃甘悅者、其美當屬之、
二主建耶路撒冷盡集以色列之遣逐者、
三主療傷心者、醫其憂患、
四主核定星數、均以其名呼之、
五我主、乃大而有洪能、其睿智無量、
六主扶自卑者、惟仆彼惡者於地、
七爾曹宜輪次讚頌主、以琴歌詠於我上帝、
八伊以雲蒙天、為地備雨、令草長於山、以糧為人用、
九以食予獸、亦予向其鳴呼之鴉雛、
十主不顧馬之有力、不喜人足之急趨、
十一主愛敬畏之者、及冀望其恩慈者。

第一百四十七聖詠

一耶路撒冷宜讚榮爾主、錫安讚美爾之上帝、
二蓋伊建爾門之關鍵、于爾曹內降福爾子、
三布安和予爾邊陲、以精細之麥飫爾、
四主遣其諭於地、其諭行之極速、
五降雪如羊毛、撒霜如灰、
六降雹如塊、孰

克禦彼嚴涼、^七主發言悉消之、令風嘯而水流、^八以其言示雅各、以其法律及審判、示以色列、^九無論何民、主從未如此待之、且伊等弗識其審判。

榮光讚詞

第一百四十八聖詠

^一眾在天者、宜讚揚主、居高者、宜讚之、^二其諸天神、均宜讚揚之、其諸天軍、宜讚揚之、^三日月宜讚之、諸施光之星、宜讚揚之、^四諸天之天、及逾于天之水、亦宜讚揚之、^五亦宜讚揚主之名、因其祇一言即有、一命即成、^六立於恒久、定准其不可越、^七宜讚揚主於坤輿、即謂大鯨諸淵、^八火及雹雪及霧、聽從主言之烈風、^九諸山、諸邱陵、果樹、諸松柏樹、^十諸野獸及諸畜、諸蟲及諸鳥、^{十一}世上諸君及萬民、諸王及世之有司、^{十二}幼童及處女、老與稚、^{十三}亦宜讚揚主名、因惟主名為高、其光榮徧滿天地、^{十四}因主舉其民之角、舉其諸聖、為親之之民、即謂以色列之光榮。

第一百四十九聖詠

一眾宜歌頌主、以新歌頌、於諸聖會宜讚美之、^二以色列宜喜悅造成之者、錫安之子、宜慶賀於其君、^三宜諧聲讚榮其名、以鼓以琴歌頌之、^四蓋主悅其民、以拯救、顯榮彼謙卑者、^五願聖人以光榮慶賀、並於其榻歡欣、^六必於口發讚榮上帝之詞、於受執雙刃之劍、^七為報復於列邦、及施刑於異民、^八令索繫彼列王、以鐵箍、箍彼卿相、^九為以紀錄之審判、行于伊等、斯榮耀皆屬其聖人。

第一百五十聖詠

一眾宜讚美主於其聖所、讚美其榮福穹蒼、^二因其全能讚美之、因其宏威讚美之、^三以角聲讚美、以琴以瑟讚美、^四以鼓及佻（yi/一、/音曰，jat⁶）讚美、以絃及笙笛讚美、^五以和聲之鈸讚美、以大聲之鐃讚美、^六凡有呼吸者、宜讚揚主。

榮光讚詞

聖詠經終

續聖詠

一昔我于弟兄中係至小者、于我父家係年少者、我牧我父之羊羣、
二我手作笙笛、我指調和琴聲、
三孰能以我告知於我主、乃主親聽我、
四遣其報信者、從我父羊羣中提拔我、以其聘質之油傳我、
五我弟兄皆係美善高大者、惟主不顧簡選伊等、
六我出向異邦人而迎之、彼以其偶像詛詈我、
七我乃奪其刀而斬之、以救以色列子之恥辱。